


# OXINTTA MIKHORA SA NWANANI

 Mooxeleliwa, atthu othene. Ni ootteeliwa murima otthikela-tho voosiis'ula otapernakulu, wira kaavekelele atthu anwereiwa olelo. Ti, imaara sinci-ene, hiyo ninniphavela orwa, khula okathi woolikana, ni—ni waavekelele atthu ankhuma mapuro oohiyana-hiyana, wira evekeleliwe.

Nto vano ninookhuma naanaanoxa, vano, nirowaka oCalifornia ni omithukumanoni sa Olimani Onkela nsuwa. Ni hiyo vekeekhai ninniveka mavekelo anyu, wira Muluku a Wirimu onimorele ikharari weiwo ni onivahe miteko s'okokhorela suulupale.

Kinoomalaru ophiya, nsana, kiireke nsana ohiyu, kiireke, ohiyu saana. Nto nsana waari nimosa wa...Ahe, nsuri, ni nsana, yaari mahiku maalupalexa a makhalelo aka. Iwe, kinnaasuwela atthu anli mano, wala araru, mpaani yaari anamoono a orwa w'Apwiya, nsana. Nto etthu yuulupale, yoothamaleya yaahikhumelela, yeeyo kihirinaaka okathi voosiis'ula wira kooleleni. Masi khino Ettiminku enrwa voosiisu, nihinatthi okhuma, khino kinookhalana okathi, Mmutthakani, wira—wira kooleleni. Apwiya yatthuna vale, kinookhala vaava, mano wira kaavekelele aretta, Ttiminku voosiisu. Siiso nitthunaka okhuma ntoko othana eriyari, vaweryaneya vale, orowa omuthukumanoni wa oSan Jose, oSan Jose California. Nto nyuwo mwaarineene atthu wuuwu, Olimani Onkela nsuwa wu, yeeyo, enaamini-ahu, wira enrwa okhala khino ewoora kiweherenryaaka, okathi munci-ene, orukunuwa onrwa mmutekoni mwaka. Ni ori vakhiviruxa, miyo koona wira waarowa wiiraneya nsana. Ni kinnaamini wira onookhala okathi p'ukathi vano, ni onrowa okhala woovikanaxa khula etthu nitonko ahu woona wala wiiwa, mpakha va. Vano, muupuwele, eyo ti SIISO ANIHIMYA T'APWIYA. Munnona? Nto siiso hiyo ninniwehererya yoowo, khula okathi.

Ni nihaana okhalana muthukumano vano vapuwani wa efeera. Kookupali wira ti yoolikana, kahi siiso, Gene? Vapuwani wa efeera oSan Jose, California. Ni onrowa okhala muthukumano wa mahiku muloko, opacerya mahiku 20, mpakha 29, o—oSan Jose. Vano, mukhale munuupuwelaka paahi ni munivekelelaka.

Vano nookhalana ntoko, nakhuma m'okathi, ewoora emosa ni nuusu vano, ninrowaahu opacerya miteko sahu wira naavekelele aretta ni oruuha Masu. Miyo koothanla, voosiis'ula, nipuro nimosa naamukhani na Soolempwa, mapuro manli mBibiliani, wira kilavule mwaha wa yeeyo.

Masi nihinatthi olavula, nrowe nuuramihe muru okathi vakhani, wira nivekele.

<sup>2</sup> Muluku ootepa oreera murima, hiyo vowiiyeviha ninnaattamela ehice Anyu ya mahala voosiis'ula, ntoko anamwane oohiphwanela, masi orwa ni omwaamini Muluku voohootererya, yoowo ovahiwe-ahu ni Erooho Yoowaarya, ni Mukhalelo Aya voohimala ni hiyo. Nto mwa natiri ni Pwiya Yesu, wira hiyo narwaaru voowiiyeviha ni navekela etthu p'itthu mwa Nsina Nawe, hiyo naanvahiwa yoovekela ahu. Tivo, hiyo kxaninweha ottuli iphwanelelo sahu, okhala wira kxanrina seiyo, masi hiyo ninweha ottuli iphwanelelo sa oKalvario, weiwo mahala ahu nivahiwe-ahu mahala-ene ni Mwaana a Muluku. Ni vanninirikela ovarela maithori yaarowa omora vammilo vahu, okathi hiyo oniisuupuwelaahu, atthu oohiphwanela, ni moota ni mahala Awe oKalvario Owo oniirenl-awe eyo hiyo, wira niwerye oruuhiwa vakhiviruxa ni Muluku, hata wa nloko nimosa. Nto vano hiyo n'a aana axilopwana ni axithiyana wa Yoowo.

<sup>3</sup> Nto hiyo ninoorwa voosiis'ula, Pwiya, vathi va nipatho nla naamukhaani, wira niivahererye mmansihu, ni mwaha wa muteko, nilapaka itampi sahu, ni—ni okokhorela wa oMuluku. Ninroromela wira Nyuwo munookhala ni hiyo ni onivaha osuwela wa muroohoni wa orwa Wanyu ori vakhiviru, wira niwerye orehererya mirima sahu khula nihiku wa yookhumelela eyo yuulupale enwehereriwa mwa miyaakha ikonto sene. Vekeekhai ephattu yothene enimwiipulela, yinlaka wira etaphuliwe. Nto irooho sahu mwa hiyo, Pwiya, sinnihimya voohihyererya, wira, "Hiyo n'anawetta ni amalapo, nto nno kuhiyo etthoko ahu, masi nimphavela Muttetthe Yoowo Namateka ni Nampaka okhanle Muluku." Hiyo ninniwehererya okathi uwo muulupale onrwa.

<sup>4</sup> Pwiya, hiyo noosuwela wira mithukumano iya, okathi hiyo ninthukuman'ahu va, hiyo ninaavekelela an'Inyu aretta n'ale ooripiwa murima. Nto hiyo ninvekela wira Nyuwo mukumane ni hiyo olelo mwa enamuna emosa y'omeekha saana, wira nvonih-iretta sothene ni ikwerere eriyari ahu. Ni siiso ekhanle-ene, Pwiya, wira natiri ula kaamuhimyaaka tokotokoni, vamuthukumanoni ni Nyuwo iwe nsana, naanaanoru vaxaakaruru, ni moota Nyuwo mwaamulipihenryaanyu emaara ti emaara. Ni hiyo ninnoona wira okathi ori vakhiviruxa. Ni wira nla nikhale nihiku, Pwiya, eniiraneyaaya, Nyuwo munrukunxaanyu muteko, Pwiya, wa etthu emosa enrowa okhalaxa vo waamorelaxa ikharari atthu Anyu.

<sup>5</sup> Nto vano, Tithi Muluku, hiyo khinnaavekelela paahi ala va, masi ale ari mulaponi mothene, ari oothoiwa, mwa erooho ni mwa erutthu. Mwaavahe, O Pwiya, soothuna sa murima aya, okhala wira an'Inyu anniilipiha mahiku ala. Ohaaxa wa nwanani ti wa ikuru saana, masi Nyuwo mootepa okhala a

ikuru saana. Maana yoolempwa, “Muulupalexa ti Ole ori mwa nyuwo onvikana ole ori mulaponi.” Ni yeela hiyo ninnixintta. Mulavule ni hiyo mwa Masu Anyu oolempwa. Nto hiyo nakhuma vale voosiis’ula, niire ntoko ale yaakhuma Emawusi, “Khinooona murim’ahu oniviha mwa hiyo okathi Owo aalavulaawe ni hiyo mphironi?” Hiyo ninvekela mwa Nsina na Yesu, Yoowo onvanhe natiri. Amen.

<sup>6</sup> Kinsoma vano mapuro manli muLiivuruni mwa Maphattuwelo. Nimosa naya nimphwanyaneya kapiitulu 24, opacerya eversiikulu 56, enisommwa so.

*Owo aahiwiirela, Muhikipisihe, okhala wira APWIYA aareeriha ephiro aka; mukihye kirowe wa pwiya aka.*

*Nto awo yaahihimya wira, nimwiitthane mwali, nimukohe mwaneene.*

*Vano awo yaahimwiihana Rapeka, khimuhimeerya wira, Munnitthuna orowa ni mulopwan’ola? Vano owo khwira, kinoorowa.*

*Vano awo yaahimuhiya orowa Rapeka ni muhi-. . . murokora aya, ni namuteko awe, ni murumeyi a Abrahamu, . . .*

*Nto yaahimureeriha Rapeka, emwiirelaka, Nyuwo murokorahu, mukhale maama a aana imilyawu ikonto ikonto sene, ni osuulu anyu owerye oxintta mikhora sa awanani aya.*

<sup>7</sup> Nto mwa Maphattuwelo 22, versiikulu 15, ninsoma.

*Nave-tho wirimu nlaikha na APWIYA nahimwiihana Abrahamu musulu emaara ya neenli,*

*Khuhimya wira, Mwa Nsina naka koolapha, anihimya t’APWIYA, wiira nyuwo muhiira etthu ila, nyuwo khamuki-. . . khamukikhoottihenrye mwan’inyu, mwan’inyu mmose-ene:*

*Wiira mooreerihani miyo kinimooreerihani, ni moowaacereryani kinimwaacererya osuulu anyu ntoko ittheneri sa. . . wirimu, ni ntoko mihaava. . . ophareya; nto osuulu anyu onooxintta mukhona wa nwanani aya;*

*Nave-tho mwa osuulu anyu maloko othene a mulaponi anooreerihwa; okhala wira nyuwo muhiuwelela nsu naka.*

<sup>8</sup> Vano Apwiya yincererye iparakhha Saya osoma wa Masu Aya. Vano kaatthuna kikuxe, vakhala wira yaahaana wiihaniwa yoosoma, mwah’aka voosiis’ula, toko, ti, “Wehereriwa sihinatthi mikhora soolaiheriwa.” Nto mwaha t’ula: *Oxintta Mikhora sa Nwanani.*

<sup>9</sup> Muluku aahikhala amwehereryaka tiithi, okhala wira Owo aahinvaha natiri. Nto okathi Muluku ommulapaawe natiri,

Owo onthhuna okupali wira mutthu ula t'ophwanela natiri, Owo ohinatthi omaliherya ele Owo ohimmy'awe wala ele Owo onimmanela-awe natiri. Tivo Abrahamu aahilaiheriwa wira mwa osuulu awe olumwenku wothene waamureerhiwa, ni wira owo aarowa okhalana mwaana. Nto, mwaan'ola, mwa yoowo waahaana okhuma Osuulu waarowa oreerihya elapo yothene. Nto Abrahamu, okathi aavahi'awe natiri, aarina miyaakha miloko mithanu na miili ni mithanu; ni Saara, amwaar'awe, yaarina miyaakha miloko mithanu na mosa ni mithanu. Masi Bibilia onnihimeerya wira Abrahamu khaamuhovenrye natiri a Muluku, mwaha wo ohaamini, masi aahiilipiha, amuttotopelaka Muluku. Ni Muluku, okathi ni okathi, aahimwehererya, masi aahiphierya wehereriwa iwo wookiserya eparakha ehinatthi wiiraneya.

<sup>10</sup> Nto ti siiso ery'aya ni Osuulu wothene w'Abrahamu. Muluku onnivaha wehereriwa iwo wookiserya Owo ohinatthi onivaha natiri. Ni vaaweryaneya, kaatthuna kihimye etthu va, mmansaka, masi kinoovarelela eyo. Wehereriwa iwo wookiserya, wira oone moota onrowaanyu waakhula. Nto okathi Owo waanvahalyaawe Abrahamu wehereriwa nno, Owo aamphwannye Abrahamu ooromeleya saana ntoko saaryaawe okathi opacenryaawe. Eparakha xeeni yaarowa okhala voosiis'ula vaakhanle wira hiyo nimmukuxa natiri Awe a ovoniha naamukhala ooromeleya saana ntoko siiralyaahu okathi weemenlyaahu va khimukupali. Hata wira meetiku ohimmye exeeni, mukhale ooromeleya paahi.

<sup>11</sup> Nto vairalyaawe yeela, khuhimukhoottiha mwan'awe mmose-ene, masi aahalela opwiniha mwaalo vatthirima va Isakhi, wira ohonone onamoona awe. Owo aahikhalela onamoona, elapo yothene yoosuveliwa owo aasuwel'awe, wira aamurowa okhalana mwaan'ola. Vano nto okathi mwaana oruuly'awe, aahivekeliwa otthikela ottuli, ni ohonona nrromelo mmosa paahi owo aarin'awe wira onamoona awe omalihieriwe. Nto okathi Muluku oonaly'awe wira owo aari ooromeleya ni waamini iwe owo waarinaawe mwa Muluku, Muluku aahiweha okhuma wirimu nto Owo khwira, "Miyoo koolapha Mmansaka wira kinimooreerihani ni owaacereryani, ni osuulu anyu onooxintta mukhora wa nwanani aya." Natiri xeeni!

<sup>12</sup> Nto Rapeka, yoowo aarowa okhala maama a mwaan'ola, oosuwanyeya, aalaiheriwe aalipeleliwa, okathi owo aaihaneliwaawe wehereriwa wookiserya, mwaha wa mutthu mmalapo owo ahaatonko awe omoona khalayi. Owo oonale paahi muteko wa Erooho Yoowaarya. Nto okathi axitiithi awe yahaaweryaaya olamula oratta-ene sinto aahaana orowa ni mmalapo ola wala nnari, wira akhale mwaara a mulopwana ahaatonko awe omoona, owo aahiruuihiwa mowehereriwani wookiserya. "Ninrowa omuruuha mwali nimuhiye owo alavule.

Hiyo noomwiiwa mwaano mwawe sinto owo onoorowa, ayo wala nnari.”

<sup>13</sup> Ti siiso eyo eniruuheliwaaya Epyo yothene ya Muluku. Ehaana okhala ni mwaano mwanyu. Muluku ontthuna owiiwani.

<sup>14</sup> Vano owo vaheliw’awe mowehereriwani, owo khaahovenrye hata minuutu mmosa. Owo aairale, “Kinoorowa.” Okisivela eyo. Kahi, “Mukihiye kuupuwele. Mukihiye kisome.” Owo aahikupalihiwa voomalela. Awo t’atthu Muluku okhanlyaawe waarumeelaka, okathi nyuwo munkhalaanyu ookupali wira Muluku onoommaliherya natiri Awe. Khwira, “Kinoorowa.”

<sup>15</sup> Vano atthu awe nto, oottikittheliwa, khino ehisuwelaka, masi awo yaahilaleerya emwiixatheryaka matata murokor’aya, ni mwan’aya mwamuthiyana; mwali ula, ooreera muYuta, emuhelaka vasulu va ekhamelo khimuroiha elapo y’amalapo, eriyari ya atthu amalapo. Masi yaahikhala Etthu mwa yaawo. Awo yiirale, “Osuulu anyu oxintte mukhora wa nwanani aya. Nyuwo mukhale maama a atthu imilyawu ikonto sene.”

<sup>16</sup> Nto, olelo, nloko nle n’atthu ni atthu a Muluku aamwareela ephareya mpakha ephareya, mulaponi mothene. Woohihimuwani iwo awo anrowa okhala ntoko ittheneeri sa Wirimu, okathi mithuko iyo soowaarya sinkhalaaya vooপুরoni vaya, siviraka osulu. Nto awo jaarwaaka, anrowa okhala ntoko iphareya ni e...ahiiso mithaaka okerekhare wa ephareya. Anrowa okhala imilyawu ikonto sene a yaawo.

<sup>17</sup> “Osuulu anyu onooxintta mukhora wa nwanani aya.” Owo ti natiri a olapha wa Muluku, “Osuulu wa Abrahamu.”

Nto, ni Erooho Awe Yoowaarya, oonaka wira maama aahaana okhala epantte ya mwaana, nave, okhala wira awo epantte mwa erutthu. Nto, Erooho Yoowaarya evaraka muteko mw’atthu ala, yiirale, “Owo . . .Osuulu anyu oxintte mukhora wa nwanani.” Nto, Muluku olaphaka wira Owo aamurowa oxintta mukhora wa nwanani, vano nipuro xeeni eyo enihelaaya Ekereja ya Muluku mukumi?

<sup>18</sup> Hiyo na Osuulu w’Abrahamu. Maana, hiyo, nikhwaaka mwa Kristu, hiyo na, Osuulu w’Abrahamu ni n’alipa-oorithi ni yoowo, mwa natiri mmosaru oolapheliwa. Hiyo na Osuulu w’Abrahamu, ni n’alipa-oomurithi khula natiri owo ovahiwaawe. Masi okathi weereriwa onrwaaya, ti vaavo hiyo onvonyaahu. Masi miyo nkinaamini wira Osuulu w’ekeekhai wa Abrahamu onoovonya. Awo anoekhala oominyala ni oororomeleya ntoko Abrahamu siiraly’awe.

<sup>19</sup> Vano hiyo ninnoona wira Muluku khokhanle ohimya etthu wala—wala omuhimya natiri vahikhanle wira Owo onoommaliherya. Owo ohaana wira eyo wira akhale Muluku. Miyaakha ohoolo waya, okathi atthu ene yaala, atthu yaalaiheriwe, osuulu w’Abrahamu yaari-aya mmukwahani

mwaya, erowaka mu—muttethe wa natiri, waahikhala mukhora weemenle, ni waanvirikanya, nto aari munn'awe, Mowabi, yoowo aahimye wira, “Nyuwo khamunlapuwa muttethe aka. Miyo kinooweha wira muhilapuwele muttethe aka.”

<sup>20</sup> Owo iirale, “Inyompe sahu salata malaxi anyu wala sawurya maasi anyu, hiyo nnimoolivani.”

Masi owo khwira, “Nyuwo khamunrowa olapuwa muttethe ola.”

<sup>21</sup> Masi natiri a Muluku aari eekeekhai. Vano awo yaahirowa khimukuxa profeta aya, Palaamu, khimuruuha wira aatakhalihе atthu. Nto va t'ile owo aahimyaawe. Awo yeerenrye omoonihа mpantte wooteпа onanara wa epyo yooreerihwa, masi Muluku aamooninhe mpantte wooloka wa yeeyo. Owo ohimye wira, “Ole onrowa omutakhaliha Isarayeli onootakhaliwa, ni onrowa omureerihа onooreerihwa.” Nto mikaano saahimala nto Isarayeli khulapuwa. Muluku aahimye wira owo onooxintta mukhora wa nwanani awe.

<sup>22</sup> Ohoolo waya, nuuvira miyaakha, aahirwa mmosa aahaniwa Daniyeli, yoowo aari munlokoni wa Osuulu yoola w'Omwene, ni muhina mwa anatiri, okhala wira owo aari Osuulu w'Abrahamu. Ni Muluku aaroomuthanla ohinatthi opattuxiwa olumwenku, wira akhale profeta Awe, ni owo aakhala oominyala ni owo aakhala ooromeleya. Ni hata mulaponi ya amalapo, owo aahilakela ni murima awe, “Miyo nkiniihonona n'awo.” Owo ti Osuulu w'eekeekhai wa Abrahamu; okhalaka mmuttetheni ori woovirikana, okhalaka eriyari ya atthu ari oovirikana, masi nnakhala vo oominyala ni natiri ule. “Miyo nkiniihonona n'awo. Miyo kinookhala ooromeleya.”

<sup>23</sup> Muluku aahimuhela mowehereriwani ntoko Owo saamwiirinhe-awe tiithi awe, Abrahamu. Nto mwene khwira, “Nyuwo munookhala ntoko mmosa a hiyo ni okokhorela ntoko hiyo sinkokhorelaahu, ahiiso kinimoorihelani mulittini mwa amwatto oovoliwa.”

<sup>24</sup> Daniyeli, ntoko Abrahamu tiithi awe, iirale, “Nyuwo pooti okirihela mulittini mwa amwatto, masi miyo nkinrowa wuuramela hata emosa wa ilatarato sanyu. Miyo nkinrowa okuxa etiini anyu yookhaleleya. Miyo kinookhala ooromeleya wa Yehova.”

<sup>25</sup> Nto waahirwa wooniheriwa nto. Mwene aahimmaliherya natiri awe vano owo aahimukuxa profeta, kiireke aahiruma oriheliwa mulittini mwa amwatto. Nto okathi amwatto, awanani a Daniyeli, akhumanse-aya emurowelaka profeta, Muluku aahimmaliherya natiri Awe. Owo aahixintta mukhora wa nwanani awe. Muluku aahihela Nlaikha vale ohoolo wa amwatto ale, nto khuxintta mukhora. Muluku onnimusuka natiri Awe. “Owo onooxintta mukhora wa nwanani awe.” Muluku ohimye siiso.

<sup>26</sup> Nto yaahikhala-tho araru ohitto iwe yaalakenle okhala oororomeleya wa niwoko, yaawo vekeekhai yaari Osuulu wa Abrahamu, ni yaari Satrakhi ni Mesaki ni Apeti-neeke, ni awo yaahiheliwa moowehereriwani. Ni awo yiirale, “Mwaahuurame mwawiiwaru atthakare yoompwaka ni malope erumaka, mwaahuuramele etiini ahu, ni ohuluwa itthu iyo nyuwo—nyuwo muneemereryaanyu! Nto nyuwo othene moovonyasa, khula enamuna. Etiini anyu khahiyo-tho yoovikana ya mutthu mukina.” Khaniniwa yeeyo okathi wothene? Masi e—etiini ya Yesu Kristu ti yoovirikana. Owerya wa ohihimuwa Wawe ti woovirikana. Hiyo n’atthu oovirikana, atthu oomeekha, nloko na onamukuttho wa omwene. Muluku t’onikhaliha ovirikana.

<sup>27</sup> Masi awo vahimalyaaya wira, “Nyuwo muhaana okhala mmosa a hiyo.” Yaamukhala saana ni Satrakhi ni Mesaki ni Apeti-neeke awo yaatthunanse okhala mmosa a yaawo, masi khiyaakhalakhala ekhalasaka mmosa wa amalapo. Vano, awo khwira, “Nyuwo mwaahiire siiso, hiyo nookhalana mukhora nno wa muttukutthani, nikhanlyaahu otthukulaka ni woorihelani mwemmo, nto munoorowa otthuna wira mwaakhanle mmosa a hiyo.”

<sup>28</sup> Awo yaahimuupuwelasa natiri. Awo yaaheettiheriwa mpakha muttukutthani oovarela. Nto vahunlyaaya mukhora khwaarihelasa mmalumini a mooro, nwanani aya aarowa waapaha, awo yaahixintta mikhora sa nwanani aya. Muluku aahimuruma Mwan’Awe okela mmalumini mmwe a mooro khuriiriha ittheke, khulavula ni yaawo ariseene mwemme. Natiri a Muluku aahikhala oororomeleya. Awo yaahixintta mukhora wa nwanani. Oowehereriwa toko, vano khuxintta mukhora wa nwanani.

Kahi Yesu Yoowo ommanne natiri? “Mwamutthekiharu mmosa wa axikhaani ala, vaamureerela otthukweleliwa nxilo muxikoni khuriheliwa eriyari y’ephareya. Muhimutthekei hata mmosa wa axikhaani ala anikaamini Miyo. Nto ithoonyeryo iya sinimwaatthara ale anikaamini Miyo.”

<sup>29</sup> Owo aahikhaliha ovirikana. Owo aahooniherya t’ani yaamini ni t’ani yahaamini.

Vo, okathi wothene, ankhala makhuru mararu a atthu, akhanle: oohaamini, oowiipaka waamini, ni mulipa-oowaamini. Masi Muluku ookhalana enamuna yo wooniherya ti pani okhanle mulipa-oowaamini. Mulipa-oowaamini ole onkhala oolipa mwa ele Muluku onihim’yawe wira Ekeekhai. Ayo.

<sup>30</sup> Aari Eliya, muTixibi, yaaphiyerenryaaya wooniheriwa, mpakha owo uupuwelaawe wira aari mmosa mulaponi nlelo aamukhalela Muluku. Nto mwene aamurowa omuhela moophukiwani. Vano awo yaahimulupattha. Ni pwiyaawene ole, mwaamukhaani oowiipintari, aaitthaniha Yesapeli, aahoopopiha ekumi awe. Nto vaphiyenry’aya wooniheriwa,

Eliya aahixintta mikhora sa nwanani awe khuttikiherya-tho nloko nothene wa Muluku. Muluku onnimmaliherya natiri Awe.

<sup>31</sup> Aari Moise, okhalaka-tho munlokoni wa Osuulu yoola w'omwene, Osuulu w'Abrahamu, wira okathi owo orummwe-awe w'Ejitu, wira aavuluxe aana a Isarayeli; ni Muluku aanvahalyaawe ithoonyeryo ni sootikiniha wira apake, ni ohonona elapo, ni waakumiherya anaphulu, ithotomwa, ni epiphi, ni maralala, ni epula, ni mooro, ni vaapakalyaawe miiriirya iya sothene. Nnakhala vo, okathi owo waakumihalyaawe ni ntata na Yehova, waahiphiya okathi owo aaphwanyalaawe mukhora eriyari ya owo ni muttetthe wa natiri. Vale yaari Ephareya Yooxeerya, ekhottiheryo yaattiyelela ephiro. Awo yaahikutteleliwa ni anakhotto a Farawo, miyaako, ni othako, ni Ephareya Yooxeerya. Masi Moise aahikelela ohoolo khuxintta mukhora wa nwanani awe, khulapuwa Ephareya Yooxeerya, ni inawu soowuuma, ntoko wira eetta ephiro ya ntthupi. "Owo onooxintta mukhora wa nwanani." Muluku ohimnye siiso, nto eyo ennimaliha mwaha.

<sup>32</sup> Saari miyaakha vakhani paahi ohoolo waya okathi wehereriwa waarwiiye-aya, nto ekereja yaari-aya yothene yoothukumelihiwa murima, ntoko eryaaya yookhweya wa muthukumano wa atthu wira okathi etthu ehinkhalaaya ntoko wiiraneya enamuna yaatthuneyaaya okhala. Muluku oniiriha siiso. Muluku onniruuha wuukhuleya mukereja, "Khula mwaana onrwa wa Muluku ohaana wehereriwa, ni wootoliwa, ni otokosiwa." Owo onnihiya eretta woophwanyani. Owo onnihiya ikwerere woorweelani, wira owehereryeni ni owootolani, wira ooniherye olumwenku wira nyuwo vekeekhai mwa Osuulu w'Abrahamu. Owo onthuniherya eyo ni otthuna Wawe Mwaneene. Owo onnitthuniherya ihasara. Owo onnitthuniherya apatthani woovirikanyani. Owo onnitthuniherya itthu iya sothene, ni omutaphula xetwani, wira oweereryeni. Nto owo onimwiira sothene masi khonikuxa ekumi anyu. Owo aamuwerya wookhalihani voolilini va mukattiyamiho. Owo aamuwerya waakhaliha anamwaattamanani anyu woovirikanyani. Owo aamuwerya wiiriha ekereja woovirikanyani. Owo onniwerya wira etthu p'itthu, ni ti otthuna wa Muluku owo wira eyo. Hiyo ninnixuttihiwa wira ti yooereraxa ovikana eweero, wa hiyo.

<sup>33</sup> Ankhi Abrahamu ni Isakhi, vamwaako, ole aavahiwe natiri? Nto mwaha w'ororomeleya wawe ni osuwela wawe, ni omwaamini wawe Yehova, yaari mwaha yeeyo, nto yeeyo paahi, Muluku aawehalyaawe vathi khwira, "Osuulu awe onooxintta mikhora. Miyo kihilaphela Mmansaka wira kinimwiira itthu iya." Khaakhanle hata mmosa muulupale Owo aakhanlyaawe omulaphelaka, masi Owo aailaphenle Mmansawe.

Vano, vakhala wira Owo aahimuhiya Abrahamu wehereriwa mpakha nipuro nlo nookiserya, Owo ohaana



owehereryani nyuwo ni miyo mpakha okathi uwo wookiserya, okathi ule wo othanla itthu sothene sinoohuluwaayani. Muhaana okhala meekh'inyu vo. Aleluya! Ti yeeyo.

<sup>34</sup> Mukhale meekhiinyu. Mukhumele iwo mwiire, “Hata wira Awo anookiiva, miyo nlelo kinimwaaroromela Yaawo.” Owo ti Osuulu w'Abrahamu. Owo ti Ole oninvaha natiri. “Khenicala etthu ale akina anihimy'aya, ale akina aniiraaya; wa miyo ni etthoko aka, ninoomurumeela Muluku.” Khwira, “Akina aya yahimya wira, 'Khiyaavo hat'etthu ya musuwelelo owo. Eyo eyuukhuwelo'; wa miyo ni etthoko aka, ninoomurumeela Muluku.”

Ni kaatthuna wiiraana ni Paulo va, ni wira, “Ephiro eniihaniwa 'wiikawanya' siiso miyo kinimurumeelaaka Muluku a axitiith'ihu.”

“Hata awo ekhalaka anamakwakaruwa mwaano mukereja, hata ekhalaka anamaasaasya, hata ekhalaka muthinto wothene wa maprofeta oowootha ni sothene okela mukereja eriyari ya atthu, ni mwa anamwaattamanani n'itthu sothene; masi wa miyo ni etthoko aka, ninimwaarumeela Apwiya. Hata othene ehiyaka orwa, ni hata wira ekereja enookhala yooriirya, yohicaliwa; miyo ni etthoko aka, ninimwaarumeela Apwiya. Hata mutthu avekeleliwa khuhipenuwa; eyo kherina naata n'iyoy; wa miyo ni etthoko aka, hiyo ninimwaarumeela Apwiya.” Wehereriwa ni wootoliwa.

<sup>35</sup> Atthu khahiyo oohivonya, masi Muluku t'okhanle. Mutthu, nyuwo mwalipiherya muupuwelo anyu wa mutthu, owo noovonya. Khino kahi volakela, masi owo onimwiira. Muluku onoomutthuniherya wira siiso wira Owo attikinye omwaamini wanyu mutthu. Waamini wahu kahi mwa ankhili a mutthu, masi mwa owerya w'ohihimuwa wa Yesu Kristu. Ti vaavo Osuulu w'eekekhai wa Abrahamu onimmumulihaya natiri aya. Okhala wira, awo anoowerya okhala Osuulu w'Abrahamu okathi anaakhelaaya Erooho Yoowaarya. Ahirina Erooho Yoowaarya awo kahiyoy Osuulu w'Abrahamu. Waamini omosaru yoole waari mwa Abrahamu onkela mwa mulipa-oowaamini. Hata wira eniireya exeeni wala moota envirikanaaya, mulipa-oowaamini oneetta okelelaka ohoolo.

<sup>36</sup> Ahotteli yaahitthika khwira, “Oh, ti—ti ololo wehererya. Khivanthuneya orowa-tho ohoolo, okhala wira atthu ale t'okorosowa iwe. Ni awo aakhalana makuveerunu aalupale, ni awo—awo aakhalana mavaka, nto, vano, hiyo hata ninooneya ntoko isoope w'awo.”

<sup>37</sup> Miyo nkisuwenle, masi kinnikupalihya waamini va wira Yoxuwa aari mutthu mukhaani, mmiravo, ookhuveya mukhaani. Kinniweya omoona otuphela, mu—muthinto mmosa wa ekaaxa, khwira, “Alopwana n'axinna,” wa atthu imilyawu piili, “hiyo ninniweyaxa waaxintta.” Munnona? Mwaha wa xeeni? Vale

waari Osuulu w'Abrahamu. Muluku aahinvaha natiri. Owo aari awaya. Muluku aahinvaha natiri. Voohicala ele yaari ekhottiheryo, Osuulu wa Abrahamu wiirale, "Hiyo ninoowerya okuxa okhala wira Muluku oonivaha."

<sup>38</sup> Nyuwo vo mweemenle voosiisu ula. Vo yeemenle Ekereja ya Muluku mukumi. Nkincala etthu mutthu mukina onihimy'awe, etthu meetiku enihimy'awe, etthu etthu p'itthu, etthu mulipaoohaamini enihimy'awe, hiyo ninniweyaxa otuphela etthu p'itthu enoorwa. Hiyo na Osuulu wa Abrahamu, ni hiyo ninooxintta mukhora wa nwanani ahu, hata wira nwanani exeeni. Muluku oonvaha natiri. Wira waari wawaya, okhalana waya.

<sup>39</sup> Ovonihiwa ekhalanelo anyu. Woopowa ekhalanelo anyu. Erooho Yoowaarya ekhalanelo anyu. Ni aakhala aalupale, alaleyi ikonto sene ni sikina mulaponi olelo, aniira, "Kahi siiso." Masi Osuulu w'Abrahamu onnisuwela wira ti siiso. Awo anookela mme n'uxintta mikhora sa nwanani. Muluku ohimmye wira awo yaamwiira. Awo annaamini okhala wira owo natiri. "Osuulu awe onooxintta mukhora wa nwanani." Vano nyuwo munoovira mowehereriwani, wehereriwa.

<sup>40</sup> Nto Yoxuwa eemenle vale, oororomeleya. Mutthu mwaamukhaani khwira, "Nkincala moota xeeni awo akhanlyaaya aalupale. Nkincala muthinto xeeni wa nivaka awo arinaaya, orakama xeeni wa makokoro aya, ni wunnuwa xeeni aryaaya. Natiri ahu t'ula, wira, 'Mukhora onooxinttiwa ni Osuulu wa aana a Muluku,' nto ninrowa weiwe naakuxe. Hiyo nooweryaxa waatuphela awo." Oh, owo Osuulu w'ekeekhai.

<sup>41</sup> Anci-ene aya yaayariwe, ntoko osuulu wa mw'erutthuni, yiirale, "Hiyo khaninwerya wira. Khivantthuneya wehererya. Moone, hiyo nri vakhani. Hiyo nri oovikaniwa; hiyo na sothene." Hata wira, owo khaarowa... Awo yaaweha e...ele niitho noonaaya. Nto Yoxuwa aaweha ele Muluku aahimmyaawe.

<sup>42</sup> Osuulu w'Abrahamu khonweha hata emosa wa itthu s'ephattu. Awo anweha ele Apwiya ahimmyaaya. Owo ti natiri. Ankhi Abrahamu aawehale s'ephattu? Muthiyana a miyaakha emiya...Miloko mithanu na mixexe, aarinaawe. Ni owo aarina emiya. Nto owo aakhala ni yoowo okhuma okathi waary'awe mwaamwali, ni owo oryeene mwammiravo, ni hata osuulu. Owo khaawehale itthu iyo. Owo ohimmye wira aawehale itthu iyo ntoko wira khisaakhanle, maana owo aaweha paahi ele Muluku ohimmyaawe. "Miyo kinimooreerihani, Abrahamu, ni kinimoovahani osuulu ni Saara." Ni owo aahaamini. Nyuwo muhiweheke ekhottiheryo. Niweheke ele Muluku ohimmyaawe. Muluku oohimya, eyo ennimaliha mwaha.

<sup>43</sup> Vano nto vaphiyalyaawe oYordani, okathi Yoxuwa aakhalihwaawe mukhulupale oomalela a anakhotto, ni ekhuruwelasa okerekhere wa maasi ni enawerya oweha epantte

ekina ni omoona Yeriko. Masi, eriyari aya, okathi Yoxuwa aarinaawe anakhotto awe oolikana, waahikhala mukhora. Mukhora owo waahianiwa Yordani.

Masi natiri a Muluku t'oreera wa khula mukhora. Hata wira mukhora xeeni, natiri a Muluku t'oreera. "Owo onooxintta mikhora sa nwanani awe." Eyo ennimaliha mwaha.

Vaphiyalyaawe oYordani voosiis'ule, khino, kinrowa waamini wira xetwani aahikhalana meeku a mwanankhaya oowiithomeya mapuro othene, mawimpi maalupale a maasi a marove evilikeyaka, imatta saahikhumpwa ni maasi oosarya. Oh, okathi xeeni wo weereriwa! Masi Yoxuwa khwira, "Mwiilikanyihe, munoorowa wona Ovuwa wa Muluku." Vano awo yaahireeriha khukhala oolikana, wiilikanyiha okathi itthu sothene sooneyaaya okhala ntoko soovirikana. Masi ole waari Osuulu wa Abrahamu, yoowo Muluku aalamphe-awe, "Miyo kinonvaha mukhora." Owo aahiphiya oYordani, owo waari mukhora awe, nto owo aahixintta.

<sup>44</sup> Voosiisu uwo kihaana ophiyerya mukhora owo wookiserya nave. Nyuwo muhaana ophiya oYordani, masi Osuulu wa Abrahamu onooxintta mukhora. Hata wira exeeni, owo onooxintta mukhora wa khula nwanani.

<sup>45</sup> Atthu othene ale yaari atthu aalupale. Awo yaakhwiye mmutekoni. Masi, vookiserya, nihiku nimoso oPetelehemu a oYuteya, Osuulu w'Omwene waahiyariwa. Yoowo, othene ale akina yaaryaaya iruku paahi. Osuulu w'Omwene waahiyariwa, kahi wa mutthu. Masi Owo aayariwe ni harusi, ni Owerya mmutikani Mwawe, wira oxintte okhwa ni omooroni. Muluku aahimmana natiri. Mutthu pure khaawerya wira. Masi Muluku ammana natiri, Owo Muluku mmosaru Owo aaryaawe okathi vakhani ovinre, ni Abrahamu, Yehova-yire, Apwiya anoovaherya ephiro y'okuxa mukhora. Ninrowa wira sayi? Yoxuwa aahikhwa. Moise aahikhwa. Akina aya yaahikhwa. Masi Muluku ohimnye wira, "Owo onooxintta mukhora wa nwanani awe." Owo onrowa oxintta sayi okhwa? Owo ohaana enamuna yo wira itthu. "Owo onooxintta mukhora wa nwanani awe."

<sup>46</sup> Osuulu w'Omwene waahiyariwa. Owo aaheereriwa mwa khula enamuna ntoko hiyo. Siiso nyuwo murin'anyu weereriwa, ni Owo aaheereriwa. Okathi aakhenly'awe Erooho Yoowaarya, xetwani aahimukuxa voowaakuvaxa, khimurwana mothakoni mahiku miloko mixexe ni ohiyu, wira eereriwe. Nto Owo vakhumyaawe. . . Ni wookhwaani Wawe awo yaahikeliha ipereku mmatatani mw'Awe, ni omusenyela wiitho Wawe. Owo aahivira mwa khula eretta. Masi okathi Owo aary'awe muumu elapo ya vathi, aahooniherya wira Owo aaniwerya oxintta eretta. Okathi maama awe mwaara a Petru aawereiwaawe, osupiwa, owo aahikwannya ntata nawe vano ettekuxa khimuhiya.

Okathi namaretta aaxonttenlyaawe vamukhora, “A mwiikho! A mwiikho! Nyuwo mwatthuna vale, munniwerya okivoniha.”

<sup>47</sup> Owo khwira, “Miyo kinnitthuna. Mukhale mukumi.” Owo aahixintta ni aahikuxa mukhora wa maretta. Owo aahikuxa mukhora wa ettekuxa.

Owo aahiiriha khula ephattu omwiiwelela Yoowo. Owo aari Osuulu w’Abrahamu, Osuulu w’Omwene, Ole aavahiwe natiri; wa Yoowo, Abrahamu ni Osuulu wothene waamutthanre, mpakha Osuulu w’Omwene, ni Osuulu wothene nuumala Owo. Natiri a Muluku t’eekekhai. Owo ooxintta eretta.

Owo ooxintta weereriwa. Okathi nwanani osenyenlyaawe wiitho Wawe, ommana wiitho Wawe, Owo aahirukunxa epantte ekina. Okathi aropoconlyaaya ireru wiitho Wawe khimusenyela, Owo khaaruwane attikihaka. Owo ooxintta mukhora wo weereriwa khuwerya.

<sup>48</sup> Vano nyuwo muniira, “Mukhalelo aka w’oviruwa khonikihya miyo wira eyo.” Nyuwo, Osuulu wa Abrahamu, ayo, mulopwana, Owo ohooxinttelani iyo nyuwo.

<sup>49</sup> Okathi Owo aaveehiwaawe, Owo khaattikihaka. Okathi Owo aatheiwaawe, Owo aakhala oomaala. Okathi Owo aaihaniwaawe xetwani, Owo aari oomaala. Owo aarina muteko mmosa, nto owo waari muteko w’Atithi, vano Owo khurowa khuvara yoowo. Vano, vookiserya, awo yaahimuroiha Owo vamwiikimanyo. Okhwa waahaana okumana ni Yoowo. Othene akina a awo yaahixintta iphareya, ni awo yaahixintta ephattu, ni awo yaahaaxintta amwatto, ni yaahixintta mooro. Awo yaahixintta itthu sothene khuhala okhwa. Masi va aari Mmosa aamana moottoporoni mw’Awe, mitika Sawe, ni aarina Owerya wo oxintta okhwa. Tivo awo yaahivara matata Awe khimookola khimukhomela Owo ni ipereku vamwiikimanyo. Awo yaahimmana Owo khimurula ikuwo mpakha makhuva Awe onweha. Masi awo vairalyaaya siiso, ni vairalyaaya sothene saawery’aya wira, okhwa waahimmana, khwira, “Vano kinimookuxani Nyuwo ntoko simwiirihalyaaka Yoxuwa. Kinimookuxani Nyuwo ntoko simwiirihalyaaka Daniyeli. Ni kinimwiira sothene iya, okhala wira kinoowiivani.”

<sup>50</sup> Nto Owo aahikhwa mpakha nsuwa wuuliwa muru. Owo aahikhwa mpakha ephattu wuuliwa muru ni khuhiya ovara muteko. Nsuwa naahitupweela othana eriyari. Ittheneeri khisaatthunne okhuma. Owo aahikhwa mpakha itthu saaryaaya sooriipaxa vahaaweryanyaaya woota ntata nanyu, othana eriyari. Kinnitthokelela wira ephattu yiirale, “Mukihye kikhwe ni Yoowo.”

<sup>51</sup> Munna! Vano xetwani aahiroiha munepa Awe wooreeraxa moowiixani wa omooroni. Iwe mikhora saahihuleya, masi Owo aahikhuma mmurotoni mwaya, khuxintta. Amen. “Osuulu awe onooxintta mukhora wa nwanani.” Ooxintta okhwa! Owo

ooxintta omooroni. Voosiisu ule woopacerya wa Paasikha, Owo aahixintta mahiye. Vano hiyo ninnivenya, ootepaxa oxintta, mwa Yoole oniphentale.

<sup>52</sup> Nihiku na Pentekosite Owo aahiveleeliha Erooho Yoowaarya, wira ethhikele, ni Amalapo, okumiha Osuulu wa natiri. Wira yaavahe Amalapo, ale ooweetteetta, wira yaavahe opatiiso wa Erooho Yoowaarya, wira yaaruuhe muhina mwa Natiri. Vano hiyo nihaana ehaakhi yo oxintta iretta sothene. Hiyo khanrina yo oxintta; eyo yooxinttiwa. Hiyo nihaana omunlela paahi natiri ni orowa omukuxa. Eyo yooxinttiwa. Okhwa wooxinttiwa. Omooroni wooxinttiwa. Eretta yooxinttiwa. Weereriwa wooxinttiwa. Axetwani othene aaxinttiwa. Omooroni wooxinttiwa. Okhwa wooxinttiwa. Mahiye aaxinttiwa. Hiyo nri vamukhora, nikuxaka, khanirina woopa hata epholovolo. Yooliveriwa.

<sup>53</sup> Nwanani awe, Owo onooxintta mukhora wa nwanani awe. Akavi? Imilyawu ikonto sene. Owo onooxintta mukhora wa nwanani awe, khula nwanani. Owo oohihimuwa mookhwaani. Hiyo ninnikuxa okhala wira Owo oonivaha. Yothene yoovaha ya mahala, ohiya yothene eyo, ni ithu sothene Owo oiralyaawe, ooxintta khula mukhora. Owo ooxintta eretta, ooxintta mukhora. Etthu emosa paahi erin'ahu wira ophiya vamukhora, wira, "Mwa Nsina na Yesu Kristu, Muxintta!" Amen.

<sup>54</sup> Waphiyaru okathi wo okhwa, nto okhwa khwira, "Nkakiweheni miyo kinoomuhiiha etiini awe."

<sup>55</sup> "Mwa Nsina na Yesu Kristu a oNasareti, mususe, Yordani!" Osuulu w'Abrahamu onnixintta mukhora.

<sup>56</sup> Vano, Paulo aahihimya, okathi awo yaaitthokihaaya wira ethikile muru awe, Osuulu w'Abrahamu, owo aairale, "Okhwa, owerya wanyu ori vayi? Mahiye, oxintta wanyu ori vayi? Nimuxukhuruku Muluku Yoowo onnivaha oxintta mwa Yesu Kristu."

<sup>57</sup> Owo onooxintta mukhora wa nwanani awe, kuxakani. Vano, owo khonxinttiwa vamukhora. Owo onooxintta ni onookuxa. Owo onookuxa. Eyo ti ni Owerya wawe.

<sup>58</sup> Mukereja mwa Muluku mukumi, voosiis'ula, wookhala Owerya wo ovoniha iretta sothene. Mukereja mwa Muluku mukumi wookhala Owerya wo oxintta weereriwa wothene. Mwa okhalana wa Ekereja ya Muluku mukumi, voosiis'ula, wookhala Owerya wo otthuka etampi khuriha, ni waakhela opatiiso wa Erooho Yoowaarya, Mukereja mwa Yesu Kristu.

"Sothene muntthun'anyu, nvekeleke mwa Nsina Naka, nto munoovahiwa. Okathi vakhani, nto olumwenku (kahi Osuulu, osuulu woohiyariwa vaneenli) khonikoona-tho. Masi nyuwo munookoona, okhala wira Miyo kinookhala ni nyuwo, hata mwa nyuwo, mpakha omala olumwenku." Exeeni? Osuulu w'Omwene. "Miteko Miyo sinvar'aka, nave-tho nyuwo munoovara. Miyo

kinooweha Yoomi wira kiri ni nyuwo, maana ithoonyeryo iya sinimwaattthara ale anaamini.”

Owo onooxintta osuulu wa nwanani awe. Owo onooxintta. Osuulu Awe onooxintta mukhora wa nwanani awe, hata wira mukhora xeeni. Yakhala eretta, weereriwa, etampi, khula mukhora, ti wooxinttiwa. Ni Osuulu wa Abrahamu onooxintta.

<sup>59</sup> Nyuwo khamuntteeliwa murima, voosiisu ula, osuwela wira hiyo nimphwanyaneya naanaano va ootepa oxintta, ootepa oxintta? Oh, khiivo hat’etthu yo owanela. Ekhotto yoomala. Epilothi yooruma. Epantera yoowela. Ni varyari va khula nikuttha na etampi, khula eriyari ya khula esaala ya aretta, ori mwiikimanyo woolipa, woophatteiwa ni Ephome ya Yesu Kristu, Muxintta. Etthu emosa paahi hiyo eniiraahu waamini, oweha ni okhala.

“Miyo kinookhala ni nyuwo. Miyo kinimooniherya. Athhu animoorwa mahiku ookiserya, ni wira, ‘Oh, ahe, *yaari* yeeyo.’ Masi Miyo kinookhala ni nyuwo. Ni itthu sene Miyo kiiraly’aka, vathi va, Miyo kinookhala mwa nyuwo, kiiraka etthu emosaru. Vano awo anoosuwela. Awo anookoona Miyo. E... Athhu Aka anookoona. Osuulu w’Abrahamu onookoona. Awo anookisuwela Miyo. Awo anookisuwela Miyo. Akina anrowa okiihana, ‘Pelizepuli,’ siiso ntoko siniirakaaya. Masi nyuwo munookisuwela, maana Miyo kinookhala ni nyuwo. Nyuwo munookoona Miyo, munookoona ni maitho anyu. Munookoona, maana Miyo kinookhala ni nyuwo, mpakha omala olumwenku, itthu imosaru Miyo kinvaraaka. Ole onikaamini Miyo, miteko sinvar’aka nave-tho owo onoovara, enamuna emosaru ya muteko.”

<sup>60</sup> Nto, olelo, Ekereja ya Muluku mukumi yookhalana oreeriwa wo weemela ni omoona muxintta, Yesu Kristu ohihimunwe, Mwaana a Muluku mukumi, okhanleene-vo, akhalaka Mukereja Mwawe, airaka etthu emosaru Owo aairalyaawe okathi ule. Vano hiyo ninnixintta mukhora wa khula nwanani.

<sup>61</sup> Nyuwo mwaarineene nwanani voosiis’ula, nto, munn’aka, eri paahi... Mwakhala Osuulu wa Abrahamu, nuumala wiiwa yeela, khaavo axetwani oophiyerya omooroni anwerya okhaliha mukhor’owo ohoolo wanyu. Onootthukuwa. Nkincala exeeni iyo. Nyuwo munoorowa vale, ntoko Osuulu wa natiri, mwiire, “Miyo kininlela ela ntoko yawaka. Ela ti yawaka, okhala wira Muluku aahilapha wira aammuhihimuxa Yesu, ni, mwa Yesu, miyo kaamurowa oxintta. Miyo kinrwa mwa Nsina na Muxintta, Yesu Kristu. Khumani. Miyo kinoovira.” Amen. “Owo onooxintta mukhora wa nwanani.” Vano mweemele vaavo, ni makhata anyu owookowa ni nikula nanyu no wiisaakiha-no naaryaka, ookhuneeliwa ni Ephome ya Pwiya Yesu. Nwanani onooosuwela.

<sup>62</sup> Mwaatthunaka etthu, mulavule ni Yoowo vano nivekelaka, nyuwo va, voosiis’ula, murineene muru anyu wowuurama.

Nto nyuwo mwaatthunaka etthu, nyuwo munonvenxerya ntata nanyu paahi Yesu? Ni mulavule paahi mmurimani mwanyu, mmurimani mwanyu, mwiire, “Pwiya, Nyuwo munnisuwela entthun’aka. Vano, miyo kihiiwa, voosiisu ula, ni owo Bibilia, ‘Owo onooxintta mukhora wa nwanani.’ Miyo kinoorwa oxintta mukhora. Khino kirina oviruwa. Khino kimphavela Erooho Yoowaarya. Etampi enookitthuka. Miyo koothoiwa. Masi miyo kinoorwa vamukhora vano. Kinrowa okuxa, voosiisu ula, mukhora aka. Tivo, muhiye, miyo kinoovira.”

<sup>63</sup> Apwiya Oottotopeliwa, Nyuwo muhoona matata ala othene. Ni Nyuwo moosuwela wira ala Masu Anyu, Pwiya. Miyo kihimye Yaawo paahi, nto kooruwa ovira mwa Soolempwa. Atthu a mBibiliani, wa moota awo yaaxinttale-aya mamwene ni okhaliha exariya, ni ottipiha mooro, owali wa mooro, ni otthyawa orere wa xoowa, ni omaaliha iyano sa amwatto, ni, oh, nave, athiyana yaahiwaakhela atthu aya yaakhwiye otthikela ekumi, ni itthu sinci-ene, okhala wira Nyuwo moohimya. Owo natiri Anyu, “Osuulu Awe.” “Osuulu anyu, Abrahamu, onooxintta mukhora wa nwanani.” Ni Nyuwo munnimmaliherya natiri Anyu.

<sup>64</sup> Vano mwaavahe, Pwiya, entthuna murim’aya. Wira ekhume va mutthu oovirikana. Wira awo ekhume, asuwelaka wira awo t’a—awo t’alipa-ooxintta, okhala wira Osuulu w’Omwene wooxintta mwaha wa yaawo. Mwene Oomwene, okathi Owo oruuly’awe, ooyariwa ni harusi, Owo oomuxintta khula nwanani, mpakha mookhwaani. Tivo okhwa wene khonwerya woopopiha Osuulu w’Abrahamu. Hiyo nihaana natiri wira ninoorithi elapo, ni ninootthika-tho mwa enamuna emosa yoovuwa, mweerutthuni yoovuwa, numala nwanani ookiserya oheliwa vathi va nnawu, na mwaana mmosa paahi ni ookiserya a Muluku onrowa orwa Moomweneni.

<sup>65</sup> Yaakhanle-ene ale avenxale matat’aya, Pwiya, akhanle anatampi, nwoopole. Ale antthikela ottuli, mwaahiye esuwele wira kharina okhalaka oothikela ottuli. Owo onniwerya oxintta mukhora owo w’otthikela ottuli. Khino ole orina oviruwa, n—nlumi, noohureya ni noonanara, wala murima wa ithaama, wala ole oomusivela, musurukhu, wala—wala etthu yoonanara, mwaahiye esuwele wira anoowerya oxintta mukhora. Khino eretta, Pwiya, mixankiho. Awo anoowerya oxintta mukhora owo, “Okhala wira Owo ohaaxeriwe sootheka sahu, onyakatteliwe sootakhala sahu. Ehukhumu ennivaha murettele yoomulemela Yoowo, ni makhwatta Awe t’anivoninhe.” Hiyo n’alipa-ooxintta, voosiis’ula. Munivahe, Pwiya.

Ni voohiya sothene iyo, muteko ole muulupale ovarawe ni Yoowo, nnakhala vo Owo ori ni hiyo. Nnya, Owo aahihimya wira aamwiira. “Woohala okathi vakhani olumwenku khunrowa okoona-tho, masi nyuwo munookoona; maana Miyo kinookhala ni nyuwo, hata mwa nyuwo, mpakha omala okathi.” Miyo

kinnivekela, Tithi, wira Nyuwo mwiisuwelihe Mmansinyu wa khula mmosa, voosiis'ula. Vano hiyo ninvekela mwa Nsina na Yesu. Amen.

<sup>66</sup> Munnaamini wira eyo Ekeekhaii? Vaxariya-vo waamini wira Ekeekhaii, hata waanyiherya wo ohoverya mmurimani mwanyu. Vano muupuwele ela paahi. Muteko wa Erooho Yoowaarya ti woowiiyevihaxa ontepanyaaya muupuwelo w'ankhili. Itthu soowiiyevihaxa kitonko aka okhalana... Kitonko aka wona Erooho Yoowaarya wira ela. Miyo kaamuhimya itthu, vano, kahaarowaaka wuupuwela okhala siiso. Vaakhanle wira kaahaana orumeela muupuwelo aka, kaarowa wira, "Ahe, khivaaweryaneya okhala yoolikana." Masi kweekwe ti yoolikana. Owo onniira itthu soowiiyevihaxa. Ni Owo oniira itthu wira aisuwelihe Mmansawe w'atthu Awe. Muluku ori n'atthu Awe. Owo ori eriyari y'atthu Awe. Owo onnaaphenta. Ni Owo onthuna owiirela yaawo, ni waakhaliherya; ni waasuwelihya paahi, kahi etthu Owo *onrowaawe* wira, masi etthu Owo *oiralyawe*. Owo ohiira. Ti yawinyu. Eyo ti yawinyu. Eyo ti yoovaha ya mahala enkhuma wa Muluku Tith'ihu, wa Ekereja Awe.

<sup>67</sup> Vano moota muupuwelo w'ankhili onrowaaya okhala wootikinihiwa, ntoko mahiku a Daniyeli, ni mahiku a aana aHeperi, ni—ni anci-ene hiyo naahimalyaahu voosiis'ula. Moone, olumwenku muulupale w'ankhili nihiku nle waari woorika oxintta ntoko siry'aya vano. Kweekwe onkhalaka nwanani, wa enamuna aya yo wona, ni siyensiya aya a vano n'itthu, saari soorika ni itthu, wa muupuwelo okathi ule, ntoko wawihu olelo. Moone, yaari etthu emosaru. Masi yaahikhala ale, okathi wothene, yaawo yaaminyala okhala vale ni wira, "Muluku t'okhanle a exariya. Masu a Muluku t'ekeekhai."

<sup>68</sup> Nto, nyuwo, khamurina yo oxintta, okhala wira Owo ooxintta. Etthu emosa paahi murinaanyu wira orowa paahi khukuxa, mweemele vamukhora, mwiire, "Ti yawaka. Ela ti yawaka. Muluku ookivaha, woopowa waka. Miyo katthuna Erooho Yoowaarya, Muluku ookivaha Eyo. Natiri t'awaka, awaya an'ihu, othene ari ottaiwene, othene ale Apwiya anthunaaya owiihana." Tivo miyo kineemelaaka. Paahi... .

<sup>69</sup> Muteko aka, wa olamula nno sa mmurimani ni sikina, onoomala vahilekenle vano. Oh, kweekwe onookhala vaavo. Masi vahilekenle onoomaliha ola, okhala wira onrowela etthu yuulupalexa. Munnona? Onoowela; okhuma ovara ntata, mpakha olamula sa mmurimani, nto vano owo onlikanela okhaliha mukina. Munnona? Munnoonna yeeyo. Nwehe ni musuwele wira ekeekhaii. Munnona? Koosuwela wira Ekeekhaii. Ni onrowa okhala muulupalexa, osuluxa, wooreera saana. Vekeekhai. Vano, Owo oolaiherya. Nto ele Owo onlaiheryaawe, Owo onniira. Owo khokhanle oovonyaka mwa natiri Awe. Nto



exeeni iyo? Mukhalelo Awe wa mahiku othene ni hiyo, wira ohiye, oosuweliheni wira Owo ohooxinttelani mukhora nyuwo.

<sup>70</sup> Owo aari Osuulu w'Omwele. Khaavo aawerya okuxa mikhora iye ohikhanle Yoowo. Othene ale ottuli wu yaari iruku sa orwa Wawe. Masi okathi Owo oruuly'awe, eyo yaahimaliha ekhotto yothene. Ekhotto yaamalihiwe oKetisimani ni oKalvario. Nto vano hiyo ninneemela paahi, ntoko alipa-oxintta. Khiivo ekhotto yo owana. Hiyo...Ekhotto yoomala. Hiyo nookhalana paahi, epaphelo ya omwaneene. Neemexeryo nilempwe ni Muluku, Tith'ihu, Yoowo ovenxale ntata Nawe, khwira, "Miyo kiniilaphela Mmansaka wira Osuulu awe onooxintta mukhora wa nwanani." Eyo eri vo. Ti yookuxiwa. "Owo *ohaaxeriwe* sootheka sahu. Makhwatta Awe *t'anivoninhe*." Yoomala wiiriwa. Owo muteko omalihiwe. Hiyo nnookuxa paahi. "Nto miteko Miyo sinvar'aka, nave-tho nyuwo munoovara." Mwene ori ni hiyo, voosiis'ula. Iparakha Sawe suulupale, Erooho Yoowaarya, eneetteetta vasulu vahu. Wona moonelo ole woovuwa, osuwela wira vekeekhai eri ni e...voolikana ni Masu a Muluku. Onninivaha ekurunuxelo yooreeraxa, osuwela wira—wira Muluku ti Tith'ihu.

<sup>71</sup> Vano, miyo kookupali, owo—owo ookawa ittikitti sa mavekelo vosiisu ula? Miyo koomuleela, vaareera, yahaakhanle-tho woohikhala atthu a otapernakulu, ahe, ahaakanwe ittikitti sa mavekelo. Masi yaakhanle—yaakhanle ntoko atthu, oophiyaka muloko, wala muloko ni athanu, wala etthu siiso, aletto mmukhorani, vano, oovahiwa ittikitti sa mavekelo, wira niwerye waaruuha ni waavekelela. Akavi akhanle aletto ni hiyo voosiis'ula? Nvenxe ntata. Oh, wulu! Vekeekhai. Aakhala muloko n'athanu wala miloko miili a yaawo. Vaareera. Ninrowa othataanya ittikitti iya sa mavekelo ni waaruuha vaplataforma. Moone, etthu ehimenry'aka yeeyo "atthu a otapernakulu", awo ari vaava.

<sup>72</sup> Olamula nno sa mmurimani. Muupuwele, miyo kinihimya ela. Olamula sa mmurimani naanaano onoophiya wookiseryani. Enookhala etthu yuulupalexu ni yooreeraxa, eri mphironi. Yaahikhala, ele ensuwelaaka, kinniwoona axinna anli naanaano va, yeemenle ni miyo nsana, okathi eyo yiiraneieye aya, moone, nto nsana naya, okathi yiiraneieye aya. Nto eyo vaara vararu voottharana, vano, yiiraneieye-aya, mulipiheryo wira naanaano va eri vakhiviru, moone, ehanle okhumelela.

<sup>73</sup> Vano, Pwiya, Nyuwo mwa Muluku, ni hiyo n'arumeyi Anyu. Hiyo ninnooxukhuruni Nyuwo mwaha wa Masu Anyu, mwaha wa Erooho Yoowaarya, Yeeyo enreeraha mirima sahu. Nto vano hiyo ninnitthapa. Hiyo nikilaanthe va, nisuwelaka wira n'alipa-ooxintta. Hiyo nookuxa mikhora sothene sa nwanani. Noovahiwa, ni nookhalana ehulelo yoovira-no mmatatani mwahu. Nsina na Yesu Kristu ninoohu-...ninoohula khula mukhora wa nwanani. Mukuxe ehulelo ela, ehulelo ya Nsina

na Yesu, nto muhu-...muhule khula mukhora wa nwanani woonthunkeni ni woohuluxani wa khula natiri.

Nto, Muluku, voosiis'ula hiyo ninoorwa mwa Nsina na Yesu, ni ehulelo ela, wira naahulele mikhora aretta ni ookattyamiheya. Maana yoolempwa mu—muhina mwa Masu Awe, “Mwa Nsina Naka anoowoomola axetwani. Anoolavula ilavulelo isya. Ni yavara inowa, wala yawurya etthu eniiva, khinaakhumelela etthu yootakhala. Anoowiixaatherya matata aretta awo anoopenuwa.” Hiyo noosuwela wira itthu iyo ti s'eekekhai. Nto munivahe, voosiis'ula, Pwiya, wira awo, atthu ewerye woona yeeyo, mwa wooniheriwa wa Masu oowiipaka erutthu ni ekhalaka ni hiyo, wira, “Owo ohaaxeriwe sootheka sahu; makhwatta Awe t'anivoninhe.” Ni wira awo yaakhele ni avonihiwe, voosiis'ula, iretta saya sothene ni ikwerere ni mikattyamiho. Hiyo ninvekela mwa Nsina na Yesu. Amen.

<sup>74</sup> Munnitthuna orumiha, Teddy, *Waamini Paahi*, voomaaleleya ni murima-murima, xontte.

Nto exeeni? Mpacenrye emosa? Nummaru emosa, ettikitti ya mavekelo. Emosa, piili, tthaaru, xexe, thanu, thanu na mosa, thanu na piili, thanu na tthaaru, thanu na xexe, muloko, wala khula nikhanle. Vaareera. Voomaaleleya, mwaaweryaka ovenya, murwe epantt'ila.

[Munna mmosa oniira, “Akavi nwihaane anyu?”—Mol.] Huh? [Ookhala oniira, “Ti yeeyo. Ti yeeyo.”] Ntoko . . .

Nrowe noone, nummaru nimosa, nummaru na piili. T'ani orina ettikitti ya mavekelo nummeru noopacerya? [Munna mmosa oniira, “Kookhalana.”—Mol.] Ayo. Nummaru na piili. Vaareera, mulopwana. Nummaru na tthaaru, nummaru na xexe, nummaru na thanu, nummaru na thanu na mosa, nummaru na thanu na piili, nummaru na thanu na tthaaru, nummaru na thanu na xexe, nummaru muloko.

<sup>75</sup> Okathi awo anrwaaya ni okuxa opuro aya wo weemela, kaatthuna kookoheni etthu emosa nyuwo akina. Akavi, aakhala atthu a otapernakulu mu, anwereiwa? Atthu a otapernakulu, nvenxe ntata. Oophiyaka mathanu...maxexe, mathanu, mathanu na mosa, mathanu na maili, mathanu na mararu. Matata mathanu na mararu wala mathanu na xexe. Ookhala mutthu wa mutapernakulu, ohikhanle a vaava otapernakulu, awo aletto ni hiyo, hata mwaaphin'ye-ene muteko opacenrye ni khuhaakhela ettikitti ya mavekelo? Munooovenxa ntata? Khula mutthu onimphavela Muluku, ohikhanle . . . ohi—ohinrwa etapernakulu yeela. Mutthu ti mutthu va ohikhanle mempuru a etapernakulu yeela, ni—ni nnya nyuwo munooowereiwa ni khamurina ettikitti ya mavekelo, muntthuna muupuweliwe mmavekeloni? Munnitthuna ovenxa ntata nanyu, khula mutthu? Vaareera. Ti yooreera. Vaareera.

76 Vano kinrowa woovekelani wira mukhale ootiitimiha ntoko sinwery'anyu, wa paahi mi—minuutu vakhani paahi, vano nto ninoopacerya naanaanoru. Vano nrowe noone. Oporu mikavi onoo halelani vale, Billy? Vaareera. Nookhalaniwa nummaru muloko osulu iwe? Miyo kiihanne nimosa mpakha muloko.

Muloko ni emosa, muloko ni piili, muloko ni tthaaru, muloko ni xexe, muloko ni thanu, awo evenye vano. Nakhala nummaru muloko, muloko n'emosa, muloko ni piili, muloko ni tthaaru, muloko ni xexe, muloko ni thanu, evenye. Vaareera. Emosa, piili, tthaaru, xexe, thanu, thanu na mosa, thanu na piili, thanu na tthaaru, thanu na xexe, muloko, muloko n'emosa, muloko ni piili. Sinnihala-tho ntoko piili, okhuma emosa mpakha muloko ni thanu. (. . . ? . . . thanu na piili, thanu na tthaaru, thanu na xexe, muloko, muloko n'imosi.) Muloko ni thanu, muloko ni thanu na mosa, muloko ni thanu na piili, muloko ni thanu na tthaaru, muloko ni thanu na xexe, miloko miili.

77 Oh, nwehererye minuutu mmosa. Miyo—miyo koomuleela paahi wira aavahe ittikitti sa mavekelo atthu ahikhanle a otapernakulu. Ti yeeyo. Munnona? Okhala wira, yaarowa okhala, moone, olamula sa mmurimani. Atthu aniira, “Atthu ala annoorwa otapernakulu.” Munnona? Miyo—miyo kinimooleelani. Akavi ari mu. . . ahinatoko okhala va khalayi? Nrowe noone ntata nanyu, khaavo otonko okhala mmosa wa mithukumano saka khalayi. Vaareera. Vaareera.

Vano, vaareera, okathi vakhani paahi vano, Munna Teddy.

78 Vano khino kinoohimya ela, wira, nyuwo othene muhiwa mithukumano, moota eniireyaaya, nnya, nyuwo, atthu othene munnikhalaka mmithukumanoni? Munnona? Okathi Pwiy'ahu Yesu aary'awe muumu elapo ya vathi, Owo khaahimya okhala mpenuxa. Owo aari Osuulu w'Abrahamu, vekeekhai, ni Owo aahikhalana natiri ni Yoowo. Owo airale wira Owo khaaira hat'etthu mpakha Atithi omoonihya. Eyo ekeekhai? Ni Owo airale “Miyo nkinwerya wira hat'etthu mpakha Atithi okooniherya etthu yo wira.” Ni Owo oona eyo ni. . . Kahi “mpakha Atithi *okileela*.” “Mpakha Atithi *okooniherya*.” Yohani Oowaarya 5:19, “Etthu Miyo kiniwoonaaka Atithi yiiraka, Mwaana oniira yeeyo.”

79 Vano okathi Owo—Owo orwiiyaawe, hiyo ninnoona wira, wopaceryani wa muteko Awe, wira Owo nuumala okuxa e—ehice ya Davidi. . . [Nipuro vahiitthu mufiitani—Mol.] Naalavulaka mwa erooho, e. . .

Okathi Erooho Yoowaarya eruuly'aya mwa Yoowo woopatiisuni, wa Yohani, nto Owo khukhala Mesiya ootikittheliwa. Vano, muupuwele, Owo aari Mwaana a Muluku okathi oyariw'awe. Owo aari Mwaana a Muluku ooyariwa ni harusi. Masi okathi Owo okhanlyaawe Mesiya, p'ukathi Erooho Yoowaarya eruuly'aya mwa Yoowo, okhala wira

*Mesiya* enihimya “oottikittheliwa.” Munnona? Ni Owo aari Ole oottikittheliwa okathi Erooho Yoowaarya emurwenlyaaya Yoowo. Nyuwo mookiiwa olaleerya *Mwaapwittipwitthi Ni Epompa*. Vano ninniphwanya wira, okathi Owo...Nuuwira mahiku Awe miloko mixexe oottehattehiwa, Owo aahikhuma.

<sup>80</sup> Nto muteko Awe waapacenrye sayi, ni waamalenle sayi? Hiyo ninnoona wira, mmutekoni mw’Awe wira aahikhala mulopwana mmosa aihaniwa Antere, aaronwe khumphwanya munn’awe, Simoni, mutothi a ihopa, khimuruuha wa Yesu. Nto Yesu khimuhimeerya, khwira, “Nsina nanyu mwa Simoni. Nsina n’atithi anyu ti Yona. Okhuma vano mpakha ohoolo munrowa wiihaniwaka *Petru*, enihimya ‘nluku naamukhaani.’” Munnuupuwela yeeyo? Nto mulopwan’ola khaareere otikinihiwa mwa ele Yesu aamuhimenry’awe!

Vano, vaari wira Mesiya aire yeeyo? Akavi answela yeeyo, yiire, “Amen.” Owo aahaana okhala Profeta a Muluku. Ayo, mulopwana. Moise iirale, “Apwiya Muluku anyu anoomuthanla Profeta onlikana ni miyo. Enimwiiraneya wira ole ohinrowa omwiiwa Profeta ola onookumihiwa eriyari y’atthu.”

<sup>81</sup> Vano, nto naweha vale, ohoolo waya, Awawe... “Owo aarwenle Awawe.” Yaari aani awo? aYuta, mwa erutthu. “Nto Awawe khuhimwaakhela Owo,” tivo Owo aahaana nto... Vano aahaana orowa w’Amalapo, moone, okhala wira Awawe khiyaamwaakhenle Owo. “Masi othene ale amwaakhenle, Owo ohaavaha owerya wo okhalihwiwa aana a Muluku.” Tivo vano Owo aarukunuwenle Amalapo, ni onnikhalaka, wa miyaakha ikonto piili. Masi vano nwehe itthu Owo iiraly’awe.

<sup>82</sup> Vano Filipe, voonalyaawe yeela wiiriwa, owo aahrowa khumphwanya Natanayeli, khimuleela Natanayeli ole owo aamphwanyalyaawe ni etthu Owo aairalyaawe. Nto eyo yaahimutikiniha. Owo aahala ohiwerya waamini. Masi vaphiyalyaawe Ohoolo wa Pwiya Yesu, okathi owo omphwany’awe nipuro Owo aary’awe, aahirwa Ohoolo Wawe, Yesu khwira, “Ola va mwIsarayeli mwa yoola kuuvo-vo wootha.”

<sup>83</sup> Vano, vaakhanle wira mwaahikhala vaavo, munuupuwela wira mwaamukhala a erooho voophiyerya wira musuwele saana wira Owo aari aani? Munuupuwela wira mwaamwiira? Vano nwehe. Munnona? Mulopwan’ole, Oohisuweliwa paahi, mu...iwe, Owo pooti aakhanle mutothi a ihopa. Owo aari kalapinteero, ti yeeyo Owo aary’awe. Mulopwan’ola kalapinteero eemenle-ene vale, Mutthu a munnuwelo w’eriyari. Nto khurwa mulopwan’ola. Owo khunweha, ntoko mmosa w’axilopwana ala va, khwira, “Ola va mwIsarayeli mwa yoola kuuvo-vo wootha.” Ahe, Owo aasuwenle sayi wira aari mwIsarayeli? Kahi enamuna owo aawanry’awe, okhala wira

othene aya yaawara voolikana. “Mwa yoola khuuvo-vo wootha.” Owo aasuwenle sayi wira aari mu—mutthu oohikhala wootha?

84 Tivo eyo yaahimitikiniha mulopwan’ola. Oryeene mutthu-oowaamini eekeekhai, owo aairale, “Rabbi,” wala munna, mulaleyi, mwiixuttihi, “Nyuwo mutonko okoona liini?” Moone, owo aamukoha Yoowo.

85 Owo khwira, “Filipe ahinatthi owiihanani, okathi waaryanyu mukhitte mwa mwiri, Miyo kaahiwoonani.”

Owo khwira, “Nyuwo mwa Mwaana a Muluku. Nyuwo mwa Mwene a Isarayeli.”

86 Yesu khwira, “Okhala wira Miyo kihooleelani yeela, vano nyuwo munnikaamini? Vano nyuwo munimoona ithu suulupalex a ovikana ela.”

87 Nto mwaha wa yeeyo kinaamini aka wira Ekereja ya Muluku mukumi enoorowa woota etthu yuulupale ovikana ela. Enimwiilikaniha wira ekele naanaano va, vohilekela, moone, okhala wira awo ahaamini. Ale akhontte, mwaha wa ikhottiheryo sa muromolelo, miyo kinnihoverya sinto anookhalakhala yaaminkii etthu. Munnona? Ithuu... Munrowa weetta Moowaaryani ahiiso okhala oohoota. Waarya onnikhaliha oohoota, wala onooniherya ephiro.

88 Axipalame, miyo kaahaaphwanya, Otthonttoni ya Otaphuwa. Moone yeeyo, Munna Thoms, mwawela vale, moone. Awo yaaniimana muru, vaavale. Nto miyo kiirale, “Exeeni yiiraneya?”

89 Khwira, “Ohiya otthara waarya, okathi wa mwanankhaya, wira elipe, awo yaaphavelasa ottipiha waarya. Awo yaahiisiiva mmansaya.”

90 Eyo t’itthu emosa paahi enkhumelela mwaawananka Waarya, munimwiisiiva mmansinyu, muroohoni. Mweetteke moWaaryani paahi ntoko Owo siry’awe moWaaryani, nto ninookhalana opatthana mmosa ni mukhw’awe, ikereja sothene sinimwaamini ni okelela ohoolo ni opuha iparakha sa Muluku. Eyo khiyaarowa okhala yoothamaleya?

91 Nkanweheni muthiyana muSamariya okathi orwiiyaawe. Owo aari muSamariya, vano (kahi muYuta), muSamariya. Nto Owo khwira, “Mukiruuhele maasi kiwurye.” Vano ovaanela khutthikela orowaka.

Ela ti y’anamurwa naanaano vano.

92 Nto ovaanela wene khukelela ohoolo. Vano, owo khaamusuwela Owo okhala Mesiya. Owo aari paahi mu—Mutthu, muYuta. Munnoona moota owo aahimaly’awe toko? Owo iirale, “Vano, khanilimalenle wa nyuwo aYuta olavula ni muthiyana muSamariya siisa.” Owo khwira, “Hiyo khanincalana mmosa ni mukhw’awe.”

<sup>93</sup> Owo khwira, “Masi nyuwo mwaamusuwenle Ole onlavulan’anyu, mwaamukivekela Miyo maasi. Nto Miyo kaamooruuhelani, woovahani maasi, nyuwo muhinrwaanyu va orika.”

<sup>94</sup> Vano, owo khwira, “Vano minuutu mmosa paahi.” Owo khwira, “Hiyo ninkokhorela vamwaako va, ni—ni nyuwo aYuta munkokhorela oYerusalemu.”

<sup>95</sup> Yesu khwira, “Masi okathi onimoorwa okathi—nyuwo ohinrowaanyu okokhorela oYerusalemu wala mwaako ola, masi mwa Erooho. Okhala wira Muluku Eroohoo, nto ale animukokhorela Yoowo aahana omukokhorela Yoowo Muroohoni ni Ekeekhai.” Munnona? Ahe, Owo khukelela ohoolo, khukhalana nvaanelo mpakha Owo osuwela vatthu vaari mulattu awe. Exeeni, nyuwo munnisuwela vatthu vaari mulattu awe? Ookhala mutthu onsuwela ole waari mulattu ni muthiyana veehimeni? Owo khaareerane axiyya, kahi siiso? Tivo Owo khumwiirela, “Murowe mwaakuxe aiy’anyu murwaase va.”

Owo khwira, “Miyo nkirina aiy’aka.”

<sup>96</sup> Khwira, “Ti yeeyo. Mookhalana athanu, nto ole munkhalan’anyu vano kahiyo awinyu.”

<sup>97</sup> Owo khwira, “Napwiya!” Vano munwehe. “Napwiya, kinoona wira Nyuwo mwa Profeta.”

Nyuwo mwasoma ehimeryo ya mukerekhere, munimoona. “Napwiya,” mwa yoopacerya, “Nyuwo mwa, kinoona wira, wira Nyuwo mwa Profeta *yoole*.” Muupuwele, mBibiliyani, ennitthikela ehimyyaka, “Profeta ole, mwa Nyuwo ‘Profeta yoole?’” Aari Profeta xeeni? Ole Moise aahimyyawe wira aamukhumelela.

“Kinoona wira Nyuwo mwa Profeta. Vano, hiyo nooxuttihiwa, ni noosuwela wira Mesiya arwa vale, Owo onimwiira itthu iya.” Ele yaari ethoonyeryo ya Mesiya. Eyo ekeekhai? Osuwela ole waari mulattu awe. Khwira, “Hiyo noosuwela wira Mesiya arwa vale, Owo onoonileela itthu iya. Masi Nyuwo mw’Ani?”

Owo khwira, “Miyo ka Yoowo, kinlavula ni nyuwo.”

<sup>98</sup> Owo aahihiya muno awe wa maasi. Aahitthimakela opooma, kinnitthokelela, ovarelenle murim’awe. Ni airaka, ovarenle matata awe vathirima vawe atuphaka paahi, airaka, “Murwe, mmoone Mulopwana mmosa Yoowo okihimenrye itthu kiiraly’aka. Ola kahiyo ti Mesiya ene yoowo? Kahi Yoole Bibilia ohimyye-awe wira aamoorwa? Owo muYuta okilaanthe vale, Mutthu pure paahi, aakhala ntoko kalapinteero. Masi Owo ookileela wira kaahikhalana axiyya athanu, ni nyuwo othene moosuwela wira eyo ekeekhai. Ola ohaana okhala Mesiya.” Eyo ekeekhai?

<sup>99</sup> Vano, Yesu ohimnye wira, “Okathi vakhani, evirelo vakhani ya okathi, olumwenku khunrowa okoona-tho Miyo. Masi, nyuwo munookoona, maana Miyo kinookhala ni nyuwo, hata mwa nyuwo. Ni miteko Miyo sinvar’aka nyuwo munoovara nave. Hata soovikana iya kiiralyaaka va, nyuwo munoovara, maana Miyo kinrowa w’Atithi, kinootthika mwa mukhalelo wa Erooho.”

Mukuttho ti woolinvwa. Osuulu wo Omwene ohookhwa; Osuulu wo Omwene woohihimuwa. Vano Ekereja yookhalihwa naxariya, mwaha wo waamini yeeyo, ni Osuulu wo Omwene onoowerya okela mw’atthu ala ni waakhaliha oorithi vamosa, aana alopwana n’athiyana a Muluku.

<sup>100</sup> Vano, wa nyuwo akina iwo, muhikhanle muliinyani mu mwa mavekelo, koomuleela wira aakawele atthu ittikitti wira... okathi omwiihanne-aka voosiis’ula. Owo aarookiihana, khwira, “Munthuna kirowe kakawe ittikitti, paapa?”

<sup>101</sup> Miyo khwira, “Yakhalaru atthu muloko mano ahikhanle a otapernakulu.”

<sup>102</sup> Vano, imaara sikina mutapernakulu kinniwiiana ni waavaha ittikitti sa mavekelo. Nyuwo munoorwa, wira, “Ahe, owo aanaasuwela. Awo yaari a otapernakulu. Owo aanisuwela mukhalelo aya. Vekeekhai.”

<sup>103</sup> Vano miyo kinoorukunxa, kiniira, “Ale a otapernakulu paahi, arwe. Vaareera. Nyuwo muhirina etapernakulu, nyuwo munrowa okhala ale ankela muliinyani mwa mavekelo.”

<sup>104</sup> “Oh, hiyo khinaasuwela awo,” yaahimnye t’ale a otapernakulu. “Hiyo khanisuwenle ole okhanle mukattiyamiho aya. Owo pooti okhala oothaka mwaha wa yeeyo.” Munnona?

<sup>105</sup> Nto miyo kiniira, “Khaavo onrowa orwa. Muhiye Erooho Yoowaarya paahi yaathanle ale ari mu ahikhanle a otapernakulu, akilaanthe vale paahi.” Nlelo, nyuwo paahi... .

<sup>106</sup> Khiivo hata enamuna nnakhala, yo omuruuha mutthu wa Muluku, vahikhanle wira owo orootthomeliwa okhala mwaana a Muluku. Khiivo enamuna yo wira. Yesu ohimnye wira, “Khaavo onwerya orwa wa Miyo ehikhanle wira Atithi Aka anoomuruuha.” Nto eyo Ekeekhai. Sothene Owo siiraawe, yaahikhala etthu yoovirikana. “Owo aira enamuna *ela*, yaahaana okhala enamuna *ela*. Nto enamuna *ela*, yaahaana othikela okhala enamuna *ele*.” Moone, iwo ohaamini paahi. Masi osuwela onkhalihiriwa ni aana awe. Tivo, nyuwo, moone.

<sup>107</sup> Vano va, kineererya ohimeerya mu—muthukumano ola w’atthu, *ela*, wira Yesu Kristu aari Osuulu yoole wo Omwene. Khanihyo hiyo; ti Yoowo. Hiyo n’atthu oorithi paahi a yeeyo, masi itthu sothene ti sawihu. Anghi nyuwo mweemenle vale nihiku nle Simoni aarwiyaawe? Nto, nyuwo, khaavo... Ela etthu yoopacerya Owo otonko awe wira.

108 Vano, eyo enrowa okhala etthu yoopacerya w'atthu ala, Owo aira vale. Awo khanatoko woona eyo khalayi.

109 Masi Simoni vaphiyalyaawe, mutothi a ihopa ohirina osoma woophiyerya wira olepeke nsina nawe vapapheloni. Bibilia ohimnye wira owo aari "oohisuwela etthu ni oohisoma." *Ni* etakanxeryo. Soopiili, "oohisuwela etthu ni oohisoma." Vano nto okathi Owo ophiyalyaawe, mwa ethoonyeryo, oweriya... Yesu, Yesu khwira, "Nsina nanyu mwa Simoni." Nyuwo munuupuwela wira owo uupuwenle exeeni? Exeeni nyuwo mwaarowaanyu wuupuwela vaakhanle wira mweemenle vaavo? "Nto nsina n'atithi anyu ti Yona. Nto okhuma vano mpakha ohoolo nyuwo munrowa wiihaniwaka Petru." Exeeni, exeeni nyuwo mwaarowaanyu wuupuwela? Mulopwan'owo aasoma muupuwelo awe? Ahe, mwaarowa wira muupuwenle exeeni? Mwaamuupuwela wira ele yaari ethoonyeryo ya Mesiya?

110 Vakhala wira eyo ethoonyeryo ya Mesiya mwa okathi mmosa, ehaana okhala ethoonyeryo ya Mesiya, okathi wa neili, okathi wa neeraru, okathi wa neexexe. Khula okathi ehaana okhala emosaru, okhala wira Muluku khokhanle orukunuwaka. Ni akavi ansuwela wira Mesiya aari Muluku? Vekeekhai. Aari Oottikittheliwa. Vekeekhai. Tivo Owo khokhanle orukunuwaka. Owo ohaana okhala mmosaru.

111 Mwaha wa yeeyo Owo aarin'awe okhalela onamoona etthu emosaru wa aSamariya Owo saawiirenyaawe aYuta. Okhala wira, maloko mararu a atthu ti atthu a Khami, Semi, ni a Yafeti; muYuta, Mmalapo, ni muSamariya.

112 Vano, munniweha Erooho Yoowaarya? Akavi ansuwela wira Petru aahikhalana ihulelo sa Momweneni? Mooweha? owo aahaahulela Nihiku na Pentekosite, aYuta. Filipe aahirowa khwaalaleerya aSamariya, khwaapatisa mwa Nsina na Yesu Kristu, masi Erooho Yoowaarya yiira ehinatthi waarweela nlelo. Awo yaahaana oruma oroweliwa Petru, yoowo aawiixaathenrye matata vano awo khwaakhela Erooho Yoowaarya. Eyo ekeekhai? Ni empa ya Kornelio, a—Amalapo yaahaakhela Yeeyo. Yaari yeeyo tu. Okhuma vaavo mpakha ohoolo, yooohuleliwa othene vano. Vano eyo eri vo, moone, Owo aahaana ohula. Muluku ookhalana inamuna so wira itthu.

113 Vano, voosiisu ula, vakhala wira Ola onvanhe Natiri Osuulu, ni vakhala wira osuulu okilanthi vaava...Miyo kintthuna kaamini wira khula mmosa wa nyuwo mwa yoowo. Vakhala wira Osuulu okilaanthe vaava, vekeekhai Osuulu onoomoona Natiri. Vano, khula mmosa w'atthu ala yeemenle va aavenxa matata aya, awo khanakhaleke mmithukumanoni khalayi. Awo aletto wa miyo. Miyo nkinaasuwela mmosa wa yaawo. Awo ahoorwa va paahi. Ni minuutu vakhani sivinre, Billy ohaavaha ettikitti ya mavekelo, nto va awo yeemenle va. Aakhala anciene a nyuwo iwo, nvenxale matata anyu, mwahaarina ittikitti sa



mavekelo, ni nyuwo nlelo mwaari oohisuweliwa va. Eyo kherina naata n'iyu. Mwaamini paahi wira mwa mulipa-oomurithi natiri uwo. Mwaamini paahi wira ni makhwatta Awe moovonihiwa. Ni mwaamini yeeyo ni murim'anyu wothene, ni munwehe Yoowo.

<sup>114</sup> Etthu emosa paahi ekhanle yoovaha ela, wiivahererya paahi wa Yoowo. Miyo nkinihimya hat'etthu; Owo t'onihimya. Nto vakhala wira Eyo Erooho Awe y'eprofeta, profeta okathi wothene aakhalana SIISO ANIHIMYA T'APWIYA. Eyo kweekwe yaari yoolikana. Ni muhikohe Mwiixuttiho, okhala wira ohaana olikana ni Bibilia, vakhala wira ti Muluku. Muluku khokhanle oohimiyaka etthu, vano nto onatthikela ottuli ni ovirikanya. Ehaana okhala etthu emosaru okathi wothene.

<sup>115</sup> Vano, nyuwo ota iwo, mwaamini. Ni sothene siri mwa nyuwo, mwaamini. Vano muhirukunuwase-tho. Mukilaathi paahi voomaala saana vano, atthu othene.

Voohaakuva paahi ni voomaalelaya ntoko sinweryaanyu.

Voohilipelela, voosiis'ula, mutthu oopacerya eemenle va mulopwana. Vano ninrowa okuxa Yoolempwa ela.

<sup>116</sup> Vano munnoona veemenlyaaka? Akavi anwerya osuwela saana yeeyo? Va aakhala alopwana n'athiyana yeemenle va, kihinatoko aka owoona, kookhalaru. Awo khanatoko hata okhala vamuthukumanoni, ni nyuwo munnoona vatthu yeemenle-aya. Awo khansuwela etthu enrowa okhumelela. Miyo nkisuwenle etthu enrowa okhumelela. Masi Muluku t'ohimye. Abrahamu khaasuwela etthu jaarowa okhumelela okathi owo aakunx'awe mwaalo wira amwiive Isakhi, masi Muluku aahimulaiherya. Eyo yaahimaliha mwaha. Owo aamwaakhenle ntoko mmosa mw'alipa-ookhwa, asuwelaka wira Owo aaniwerya omuhihimuxa mw'alipa-ookhwa. Eyo ekeekhai? Vano eyo ennimaliha mwaha.

<sup>117</sup> Vano, va eemenle mulopwana vakhiviru ni miyo, nkinatoko omoona, nkinsuwela hat'etthu ya yoowo. Hiyo khaninsuwelana mmosa ni mukhw'awe. Hiyo khaninsuwelana mmosa ni mukhw'awe. Muluku onninsuwela hiyo oowaili.

Vano, ni yoovaha ya Muluku, kawerya-ru paahi ni yoovaha... Vano, soovaha iyo siniyariwa mwa nyuwo. Muluku orootthoma ohinatthi opattuxiwa olumwenku. Akavi ansuwela yeeyo? Tivo khiyaarowa okhala etthu kaarin'aka, wira kikkhalane yoovaha. Muluku paahi t'othanlale eyo. Miyo nkinathanleke eyo. Owo t'othanlale eyo. Munnona? Ntoko maprofeta a Waataana Wa Khalayi, n'atthu oohiyana-hiyana, awo jaarootthomeliwa wira yiire, wira yiire yeela.

<sup>118</sup> Vano, vakhala wira mulopwan'owo onowereyiwa, miyo nkaarowa owerya onvonihia. Mulopwan'owo aatthunaka etthu, jaarowa otthariha ele aarowaawe otthuna vakhala wira kaamuwerya omukhaliherya wala nnari. Pooti okhala, yaakhanle etthu ekina ntoko owo... etthu yaamukhaani

kaarow'aka owerya omukhaliherya, vano, miyo kaamutthapela wira yeeyo. Khino owo orina mukhalelo w'oviruwa. Khino owo khahiyo hata muKristu. Khino owo muKristu. Khino owo namawoka. Miyo nkisuwenle. Ankhi akhala otuphela voowiiptheya, mmosa oikelinhe voohuupuweleya, khurwa va aikhalihaka ntoko etthu? Nkawehani etthu eniiraneya, moone, paahi—moone paahi etthu eniiraneya. Miyo nkisuwenle.

<sup>119</sup> Masi, moone, nyuwo weemela va, nto nyuwo munoowerya weemela volikana, musuwelaka wira Muluku oommana natiri, Muluku onnimmaliherya natiri Awe. Munnona? Vano, vakhala wira Muluku onnimmaliherya natiri Awe, eriyari, va naanaano va, ya atthu ala; akavi iwo anrowa okilaathi iwo, ni ni murim'anyu wothene munrowa waamini? Murima anyu wothene, munoorowa waamini? Vano nyuwo mukaamini paahi.

<sup>120</sup> Vano nrowe noone. Nrowe nikuxe Yoolempwa emosa. Vano, Simoni Petru aahirwa wa Pwiya Yesu. Nto aphiyaka wa Pwiya Yesu, Pwiya Yesu aahimuleela wira owo aari pani, ni—ni aahimuleela itthu sa makhalelo awe. Ahe, Yesu yoowo mukumii olelo. Owo. . . Munnaamini wira oohihimuwa mw'alipa-ookhwa? Munnaamini wira Erooho y'oMesiya enikhala Mukereja, olelo, siiso ntoko Eyo kweekwe eniirakaaya? Vaareera.

<sup>121</sup> Vano, nyuwo vamuthukumanoni, muhirina ettikitti ya mavekelo, nwehe nno mwiire, "Pwiya!" Vekeekhai, khasikhanle ittikitti sa mavekelo voowiriyani, kookhalana othene yeemlele va. Nyuwo vamuthukumanoni mwiire, "Pwiya, Nyuwo mukikwannye." Moone eniiraneya. Moone eniiraneya. . . ? . . .

<sup>122</sup> Vano, mulopwana, yaakhanle enamuna yo wookhaliheryani, miyo kaamwiira. Moone, miyo paahi, hiyo n'amalapo va paahi, ni miyo—miyo kinoopaceryaru owoonani. Masi miyo kinnithokererya, ntoko murumeyi, ohimya Ekeekhai ni okhala namoona a Yesu Kristu. Nto, vano, nkinthuna wira mukileele etthu p'itthu. Kintthuna paahi wira nyuwo mukaakhule sinto ekeekhai wala nnari, vano nto mmuhiye Owo wiira. Nto vakhala wira Owo onoopaka enamuna emosaru va vaplataforma, mwa erutthu ila, Owo iiraly'awe mw'erutthuni mwa Yesu!

Owo ti Muluku, mwa Kristu. Yesu ohimnye wira, "Miyo nkiniira hat'etthu mpakha Atithi, yaawo ari mwa Miyo, okooniha Miyo. Awo annikileela etthu yo wira." Tivo khaari Yesu aamuhimenrye muthiyana. Yaari Atithi, mwa Yoowo, yaamuhimenrye muthiyana. Aari—khaari Yesu aasuwela t'ani aari Simoni Petru, yaari Atithi yaakhala mwa Yoowo, yaasuwela t'ani aari Simoni Petru. Ti yeeyo. Munnona? Ti yeeyo.

<sup>123</sup> Miyo kinoowerya wooleelani, vano, nyuwo mwa muKristu, ayo, mulopwana, okhala wira nyuwo murina e—e—erooho yo waakhela enthukumela voophenteya. Nto, owo, owo mulipa-oowaamini. Owo muKristu. Nto nyuwo munihaaxeya ni mukhalelo wo oviruwa onooruuhelani owereiwa nipwiipwi.

Eyo ekeekhai? [Munna oniira, “Ti yeeyo.”—Mol.] Munnona? Munnona? Vano, eyo ti yoolikana. Sayi yeeyo? Kisuwenle sayi yeeyo? Yaarowa oweryaneya sayi miyo osuwela yeeyo? Hiyo khinnatoko woonana mmosa ni mukhw’awe khalayi. Eyo ekeekhai. Kehiyo? [“Eyo ekeekhai.”] Khino Owo onimooleelani etthu ekina ya nyuwo. Miyo kinimooleelani. Va yookhala etthu. Miyo kinnimoona muthiyana vakhiviru ni nyuwo. Owo ori ni nyuwo. Ti mwaar’inyu. Owo onniphavela mukhaliheryo, nave. Ayo, mulopwana. Munnaamini wira Muluku onniwerya okileela va etthu evonyeieye niamwaar’inyu? [“Koosuwela wira Owo onniwerya.”] Vaareera, mulopwana. Owo orina muxankiho wa murima, mikattyamiho. Ti yeeyo. Kahi siiso? Oviruwa, nave. Ayo, mulopwana. Vano, nyuwo khamuhiyo a epooma yeela. Nyuwo munttikela epantt’*ila* mwaarowaka owaani, murowaka oCincinnati. Ti yeeyo. Nyuwo mwa a Cincinnati, Ohio. Nsina nanyu ti Milliken. Mutthike, mutthikele owaani, mukhale mukumi. Apwiya animooreerihani ni munoovonihiwa, nyuwo ni amwar’inyu. Muluku ooreeriheni.

Murwe, mulopwana. Munnaamini? Vano mwaamini paahi. Muhihoverye.

<sup>124</sup> Vano mukhale oottittimiha saana. Atthu othene vano ekhale oottittimiha saana, mukhale oomaala. Moone, Erooho Yoowaarya ennuuliwa muru saana. Akavi ansuwela yeeyo? Wuuliwa muru saana, Erooho Yoowaarya, moone, othikileiha omosa vakhani paahi ennihaaxa Eyo.

<sup>125</sup> Voohimya wa matothoro, nyuwo muhaana okhwa okathi p’ukathi, ni mukattyamiho wa murima. Ti yeeyo. Nyuwo murwiiye va okhuma oChicago, Mwenye Mosley. Nsina nanyu noopacerya ti Theodore. Munnimwaamini Muluku? [Munna oniira, “Ayo.”—Mol.] Vano rowakani owaani mukhale mukumi, mwa Nsina na Yesu Kristu, nto mukhale mukumi. Muluku ooreeriheni.

<sup>126</sup> Munnimwaamini Muluku? [Munna muthiyana oniira, “Vekeekhai ti siiso. Ayo, mulopwana.”—Mol.] Munihaaxeya ni eretta emosa vamwettoni vanyu. Nyuwo khamuhiyo a epooma yeela, nave. Nyuwo mwa a Owensboro, Kentucky. Nsina nanyu mwa Muhano Lamb. Mutthikele owaani mukhale mukumi.

<sup>127</sup> Muhano okilaanthe vo, nave a Owensboro. Murina muuwe vanipeleni vanyu va. Muhaana wooperariwa, meelo. Murowe, mwaamini, ni mukhale mukumi.

<sup>128</sup> Munnaamini, mulopwana? [Munna oniira, “Ayo, kinnaamini.”—Mol.] Hiyo khaninsuwelana mmosa ni mukhw’awe. Nsina nanyu mwa Mwenye Gilmore. Ti yeeyo. Munikhuma oAnderson, Indiana, weiwo eri eyeettiheryo yuulupale ya Ekereja ya Muluku. Ti yeeyo. Nyuwo mweemenle va mwaha wa mwan’inyu muthiyana osupiwe epantte emosa. Owo oruusupiwa epantte emosa. Munnaamini? Vano murowe

owaani mumphwanye enamuna sinaaminni anyu. Vaareera. Muluku ooreeriheni. Mwaamini. Mwaamini.

<sup>129</sup> Munnaamini ni murim'anyu wothene, mulopwana? [Munna oniira, "Ayo, mulopwana."—Mol.] Nyuwo mwa a oIndianapolis. Nyuwo mwa murumeyi a Ehapari yooreera. Awo t'a amwaar'inyu. Uh-huh. Awo anoohaaxeya nave. Awo arina mukattyamiho wa nipwiipwi munipwiipwini. Meetiku. . . Arina mukattyamiho wa murima; ooviruwa vakhani. Kinnoona wira awo t'ottiyana naaru. Exeeni. . . Murwe va.

Nyuwo erooho yo ottiya maaru, mwa Nsina na Yesu Kristu, miyo kinnoorumani mwa Muluku mukumi, mukhume mwa muthiyan'owo.

Vano nyuwo munniwerya okiwa oratteene vano. Nyuwo oowanli murowaseke owaani mukhale akumi. Mutthikele owannyinyu. Munnikiwa, nto nyuwo mookhala saana. Nyuwo munookhala saana.

<sup>130</sup> Munnaamini ni murim'anyu wothene? Mmwaamini Muluku paahi. Mwaamini.

<sup>131</sup> Wiipa iwo makhonyokhonyo ni etthu ti yootakhala saana. Munnaamini wira Muluku onimoovonihani? Nto mweette nviraka vale. Rowakani owaani, nvuwihaka Nsina Nawe, mwiiraka, "Kooxukhuru, Pwiya Yesu."

Etthu kivarenlyaaka eyo vowaakuveyaxa, muthiyan'ola aarina etthu emosaru, wiipa makhonyokhonyo.

Munnaamini wira Muluku onimookhalihani mukumi? [Munna oniira, "Ayo."—Mol.] Vaareera, mulopwana. Vano mweette nviraka vale, mwiire, "Kooxukhuru, Pwiya Yesu," nto muroweke owaani.

<sup>132</sup> Vaareera, murokor'aka, murukunuwe paahi mutthike, mwaamini. Owuumani makutha orinaanyu, va, ni mukattyamiho anyu wa murima, ni siiso. Murukunuwe paahi mutthikele owaani, mwiire, "Kooxukhuru, Pwiya Yesu," ni mukhale mukumi. Mwaamini ni sothene siri mwa nyuwo.

<sup>133</sup> Munnaamini? Ankhi iwo, akina wa nyuwo atthu, munnaamini?

<sup>134</sup> Mwaamuthiyana okilaanthe vo, ooriipa maihi, orina ecile, munnaamini wira Muluku onimoovonihani? Nyuwo munnikupali yeeyo? Vaareera. Mwakupali vale, Owo onimwiira.

<sup>135</sup> Va ori mulaleyi mmosa, okilaanthe va, otthunaka weetta vakhiviru ni Muluku. Kahi siiso, mulopwana? Munnaamini wira Muluku onoowiirelani yeeyo? Nvenxe ntata mwiire, "Miyo kinnaakhela." Ah-ha.

<sup>136</sup> Muhan'ola okilaanthe va, oruuhlenle ntata nawe vathi. Owo orina mukattyamiho wa muroohoni owo onuupuwelaawe. Ti yeeyo.

137 Va ookhala mwaamuthiyana mmosa va, uupuwelaka vakhala wira onoorowa okhalana mwan'awe. Ti yeeyo. Nyuwo mootoko okhala mmosa wa mithukumano saka. Miyo kaahoolaiheriyani, mwa Muluku, mwaana. Miyo nkiirale? Vaareera. Vano rowakani owaani mwakhalane. Muhivela-vele tho mwaha wa yeeyo.

138 Munnaamini ni murim'anyu wothene, othene anyu? Khula mmosa wa nyuwo munnaamini? Osuulu wa Abrahamu nooxintta mukhora, mukhora wa nwanani. Nyuwo mwa Osuulu wa Abrahamu, mwa Yesu Kristu? Nvenxe matata anyu mwaaryeene yoowo.

Vano mmwiixaatherye matata namwaattamanani anyu, namwaattamanani anyu, mmosa ni mukhw'awe. Mwiixatheriyane matata mmosa ni mukhw'awe. Muxintte mukhora vano. Ti wawinyu. Ti yawinyu. "Mavekelo o waamini anoowoopola aretta. Muluku onimwavenyiha." Vaareera, nvekele enamuna anyu mmansinyu. Nvekeleke enamuna muniir'anyu okereja wanyu. Mwaavekelele atthu ari ni nyuwo vano. Mwiixatheriyane matata mmosa ni mukhw'awe nvekele.

139 Pwiya Yesu, hiyo ninoorwa mwa Nsina nle nuulupale, Noowerya sothene na Osuulu wo Omwene, Osuulu w'Abrahamu, yoowo aalaiheriwaawe vamwaako vaavo Nyuwo mwaanvahenryaanyu mwaapwittipwitthi; nto khimuhela mwaapwittipwitthi yoowo mothakoni, etthu ya mwiiriirya, ntoko Nyuwo siiraly'anyu ni ikhopa iye, nsana.

Miyo kinvekela, O Pwiya Muluku, wira Nyuwo nveleelihe Owerya, waamini. Ni muhiye khula Osuulu. . . Miyo koosuwela wira awo animwiira, Pwiya, okhala wira Nyuwo moohimya, "Osuulu wa Abrahamu." Nto yaakhanle-ene akina ankhala yoothereryaka okhala Osuulu, nave ehikhanle Osuulu, mwaalevelele mwaha wa otthuna waya va, ahiiso woothererya. Ni wira Erooho Yoowaarya naanaano va evihihe munep'aya ni waamini okumi. Mutthuniherye Erooho Yoowaarya yeette khula murima ni yaavonihe atthu othene va. Awo arina matata aya mmosa vasulu va mukhw'awe.

Osuulu wo Omwene ohimye wira, "Ithoonyeryo iya sinimwaatthara ale anaamini. Yawiiixaatherya matata aretta, awo anoopenuwa." Nto Ole omuhimye natiri ori vaava vano, aisooniheriyaka Mmansawe wira Owo ori vaava. Vo ori Osuulu ni matata aya vasulu mmosa ni mukhw'awe. "Ithoonyeryo iya sinimwaatthara ale anaamini." Erooho Yoowaarya yeette mwa khula nimoso wa matata aya, mpakha mmurimani mw'atthu, mweerutthuni, ni yaavonihe atthu othene ari Ohoolo wa oMuluku. Munivahe, Pwiya.

Miyo kinnipwapwela xetwani. Kinnipwapwela ohaamini wothene. Kinnipwapwela khula erooho yootakhala. Kinnipwapwela khula namoothererya. Miyo kinnipwapwela itthu sothene siri soovirikana ni Masu a Muluku. Nto

mutthuniherye Erooho Yoowaarya ekuxe opuro Aya mmurimani mw'atthu, naanaano va, mwa waamini. Wira khula eretta ni khula ekwerere, khula muxankiho waahiye atthu, mwa Nsina na Yesu Kristu. Amen.


<sup>140</sup> Vano, Osuulu w'Abrahamu, nyuwo mwa a nloko na omwene, nyuwo mwa a natiri, mwaha wa mahala ni mukhaliheryo wa Muluku, akavi a nyuwo anwerya ovenxa ntata, wira, "Miyo kihaakhela etthu kivekenly'aka." Kooxukhuru. Ti yeeyo. Ti yeeyo natiri okhalenly'aya. Ti yeeyo natiri ovaheriwaawe, wira nyuwo mukhale mulipa-oorithi itthu sothene, mwa Yesu Kristu yoowo owooponleni. Owo owoopolani mwa etampi. Owo owoopolani mwa eretta. Owo owoopolani mookhwaani. Owo owoopolani omooroni. Owo owoopolani mmahiye.

<sup>141</sup> Nyuwo muniira, "Munna Branham, masi hiyo othene ninnirowa mmahiye." Masi mahiye khanwerya onivarelela. Owo aahirowa-mo, nave, masi khiyaawenrye onvarelela Owo. Vekeekhai. Khanwerya onvarelela Owo.

<sup>142</sup> "Ahe, Munna Branham, miyo nkinreere weereriwa." Ni Owo aaheereriwa, nave. Masi Owo owoopolani moweereriwani.

<sup>143</sup> "Muhineettiherye moottehiwani, masi munaakiherye sootakhala." Moone, Owo ohiira. Yothene ti yawinyu. Itthu sothene ti sawinyu, mwa Yesu Kristu. Owo onnoovahani sothene, mahala. Khiwaavo oliverya, hat'etthu. Ti yawinyu paahi naanaano va. Khamuteeliwe murima mwaha wa yeeyo? Khamutteelewe murima mwaha wa Yoowo? Nimuxukhuruku Muluku.

<sup>144</sup> Vano, sinookhala miteko s'okokhorela, ola, ohiy'ula. Ayo. Ohiy'ula, ewoora yaneethanu na piili ni minuutu miloko miraru ohiy'ula. Kinoomuhiya pastore ooleleni. Murwe. Murwe.

Vano, Ettiminku enrwa, Apwiya ooreera murima yatthuna vale, kinootthika wira kaavekelele aretta, otapernakulu, wala nipuro pi nipuro. 

*OXINTTA MIKHORA SA NWANANI* EMK59-1108

(Possessing The Enemy's Gates)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yeetaka 8 mweeri wa Novembro, 1959, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)